

Kiglerpotunamu Tokanchi

Kpashiri Gwa Yonatanru

Tokanchi

1 ¹Yinuwakikolu wane rawa Tokanchi. Ga wa Tokanchi Goyakaluymananru. Ga wa Tokanchinwa Goyakalu. ²Yinuwakikolu Tyenwa Goyakaluya.
³Ptowrunanuka kamrutka Waleya. Wale mwaknu gikenna kamrutka wa gwachritka. ⁴Wale rawa giweklu. Ga wa giweklunwa yine pokamlatyegitachri. ⁵Pokamlalu mapshagawaka pokamlatachri. Wa mapshagawaka gi gaglakolu.

Gwa gipgujtatlu pokamlalu

⁶Waneru satu jeji Goyakalu yokanatanru. Gwa giwakatletachri. ⁷Wale gina rupgujtalewatinripa, rupgujtatyaplu pokamlalu, ralixinripna pejnuruneko wale chinanu. ⁸Gi wa pokamlalni wale, seyni runa rupgujtatyaplu pokamlalu.

Pokamlalu galikakpotunamu

⁹Tokanchinwa pokamlalu galikakpotunamu. Wa pejnuruko yineru pokamlatachri tye psolchijneko gapokachri. ¹⁰Tyechijne rawanata. Tye psolchijneko kamrutka Waleya. Tyechijne gajene gi gimatl. ¹¹Walenu runyegita Wale. Ga wa Walenune gi wa

yoptotluna. ¹²Seyni pejnuruneko yoptotjene Wale gitakna Goyakalu wgenene rixinripna, wa ralixgiwakatjene. ¹³Wanna gi wa granchiko wugenetikna, gi wa manchi galukyawaka, gi wa jeji galukyawakako, seyni Goyakaluya wugenetikna.

Tokanchiko manewata

¹⁴Tokanchiko manewata. Wixatskala rawanatapa. Wetlu royaknu. Girchi satupjerutu Gituru goyaknu waneylu. Kgimutlewaklerpotni. Galikakpotni.

¹⁵Gwa gipgujtatlu. Wane china sapleta, “Tyenwa nchinjenatanru, ‘Najxigi ginachripa, muchichachri gitaya, gi rixanu muchinanu gwachrini gitaya.’” ¹⁶Gi rixanu wane rixle gixoluruya wyopto jeta pejnurunekwu. Ga wa rumutlewie potu wyoptota. ¹⁷Gi rixanu Moysisiya renee ka Tokanchi Yukanatkaluru. Wa Geso Kristo chinanu rawa gimutlewlu ga wa galikakpotunamu tokanchi. ¹⁸Gikena getlu Goyakalu gi pagogneko. Girchistsi gwachri, satupjerutu Gituru, Wale ginkakletlu.

Gwa Katlewakleru gipgujtale

¹⁹Tyenwa Gwa gipgujtale, wa Goteyone yakanatinitkana Gerosaleyra

sasertotene ga wa Rewinane repomgiyapluna, “¿Giryi pixa?”

²⁰Rupgujetnawa Gwa. Gi wa nutatnawa. Rupgujetnawa, “Gi wa Kristono gita.”

²¹Repomgaluna, “¿Klunerkoxni? ¿Giliyaklayge pixa?”

Wane china, “Gi waleno.”

“¿Wa tokanchi geneklewatachrirayge?”

Rugita, “Gike. Gi waleno.”

²²Giyagni wane chinruna, “¿Gi gixachriyi? wunkakyapna wyokanatjene. ¿Gi pchinmawa pixnanuko?”

²³Wane china:

“**Gitni giplaji yineru mwiyawakanu sablewatyachrino,**
wane chinachrino:

Mpotukatanru Gitsrukaachigapo,
wa Gisayiya tokanchi geneklewatachri chinyawaka.”

²⁴Wa yokanatkalue, Gwariseyonenu.
²⁵Repmogaluna. Wane chinruna, “¿Klu koxa pkatlewatya, wa Kristomigiekji, gi wa Giliyyi, gi wa tokanchi geneklewatachrikoxi?”

²⁶Gwa gigitna. Wane chinna, “Gita katlewata gonuya. Seyni gixatskala rawa wa gixa mumatanatu. ²⁷Walenwa gita gajxigi ginachri. Gi wa gita gimukluni wa nkoshapirokyaplu yoshmaklejixitsa.”

²⁸Tyekaka wane gixkaluru Wetawara Pokchi, Gorta wakanute, wa Gwa katlewjetjawaka.

Getanru Gowega Wgene Goyakalunu

²⁹Waleprikgogne Gwa getlu Geso wale yegi yachri. Wane china, “Getanru Gowega Wgene Goyakalunu, tye psolchijneko gajene konmukochiretachri. ³⁰Tyenwa nchinjenatanru, satu jeji najxigi ginachripa, Walenwa muchichachri

gitaya, gi rixanu muchinanu gwachrini gitaya. ³¹Gi numatanatlu. Seyni wa rumatikolupa Gisrayiline yegi, giyagni nuna gita nkatelewatiripa gonuya.”

³²Wa Gwa gipguitalewata. Wane china, “Netlu Giweikaluru tengogne gjirukyachri. Motkoko pixka rixa Geso gogo gwachri. ³³Gi numatanatlu, seyni wa nyokanatjeru gonu nkatelewatiripa, Wale wane chinno, ‘Wa Giweikaluru peta gjiruklegogwakatanru, Wale gogwaka gwachri, Walenwa Giweikaluru Kpashiri katlewatirachri.’ ³⁴Gita getlu. Nunkakletlu Tyenwa Goyakalu Wgene.”

Muchichachine Geso yimaklene

³⁵Waleprikgogne rumepe tunwaleta Gwa, ga wa gepi yimaklene. ³⁶Rushinga yaletinri Geso, wane china, “Getanru gowega Wgene Goyakalunu.”

³⁷Gepi yimaklene yijnako yanumsaletlu. Romkagitatkaluna Geso.

³⁸Ruprotaka Geso. Retna rawgajxigitjene. Wane chinna, “¿Klu gijga?”

Wa wanna wane chinru, “Rawi (walenwa yokaakaluru, Yimaklewatachri), ¿ginaka pwa?”

³⁹Wane chinna Wale, “Ginanu. Getapanru.”

Wane yana. Retluna ginakakta rawa. Walgogne rutukna Wale yegi. Kayinwakpapkotkani.

⁴⁰Wa gepi Gwa yijnakotachine, romkagitatjene, satni Gantirishi Simo Petro gepuru. ⁴¹Gantirishi gikshikgapkatlu waleko yegwaklu Simo. Wane chinru, “Wukshikatkalu Mesiya.” Walenwa yokaakaluru Kristo.

⁴²Geso yegi raniklu. Geso getlu. Wane china, “Pixni wa Simo, Gona wgene. Pixa giwakatko Segu. (Walenwa yokaakaluru Sotlu.)”

Geso tomgana Wilipi, Natanayli

⁴³Waleprikgogne Kalile raluka yaleta Geso. Rukshiklu Wilipi. Wane chinru, “Pomkagitanno.”

⁴⁴Wetsayta Pokchi gajerni Wilipi. Walenwa Gantirishi ga wa Petro pokchi. ⁴⁵Wilipi gikshiklu Natanayli. Wane chinru, “Wukshikatkalu Moysisi yonyegitanru Tokanchi Yokanatkuruya, ga wa tokanchi geneklewatachine koxa yonyegitanru. Gesni, wa Gosi wgene, Nasare Gajeru.”

⁴⁶Natanayli wane chinru, “Nasarege rumkata giyakletya pagixanu kigleru?” Wilipi wane chinru, “Punanu Petapanru.”

⁴⁷Geso getanataplu Natanayli. Wane chinyegitlu, “Getanru satu galikakotunananu Gisrayili. Walenwa mayrokletu.”

⁴⁸Natanayli wane chinru, “Ginaka pumatayano?”

Geso gigita. Wane chinru, “Wilipi ma tomgakanuwayi, wa gikera rapukote pwanatini, netyi.”

⁴⁹Rugita Natanayli. Wane chinru, “Rawi, Pixni Goyakalu Wgenyi. Pixni wa Gisrayiline Pogiryi.”

⁵⁰Geso gigitlu. Wane chinru, “Gi rixanu wane nchinyi, ‘Netyi wa gikerampukoya,’ epalixge? Tyekaka pnute tsru petanu.” ⁵¹Wane chinru, “Galikakni, galikakni wane nchingi, xanikakayakawa getanru tengogne gitpukinri, ga wa Goyakalutowrene gatskomtachine, gjrukamtachine Gita Yineru Wgenno yegi.”

Kashimyolu Kanaya

2 ¹Waleprika pnutgogne waneru kashimyolu Kana Pokchiya, Kalilesreta. Wanero Geso ginro. ²Chanixka koxa Geso ga wa yimaklene kashimyolu yegi. ³Winga magata. Wa

Geso ginro wane chinru, “Winga maleshayna.”

⁴Wane chinru Geso, “Gi rixno Gita ga wa pixa, suxo? Gi rapokawa nopapko.”

⁵Runro wane chinna gipxaklewatachine, “Gkamrutantu klunerukokta runkakyagi.”

⁶Wanenanru patsruijre sotlu gashgaji, wa powratjetyawakna Goteyone. Gepi, mapa yokmajtagapi jigloklu satkaka.

⁷Wane chinna Geso, “Ntseptagatanru gonu tyekaka gashgaji.” Tsepotgapotutluna.

⁸Wane chinna Wale, “Nsajikgatanru xani. Nikikwaka chinanuwatyachri ganikyegitanru.”

Ranikyegitluna. ⁹Wa retumginitkalo chinanuwatachri gonu kamrutikaluro winga, gi rumata ginaka tuyakaty, seyni wa gipxaklewatachine gonga saajegatachine gimata. Wa chinanuwatachri tomgalu gnunrowatachri. ¹⁰Wane chinru, “Pejnuruko yineru muchinanu rutaklo kiglero winga. Wa rumetinitkana rutakatkalo mugletotka. Ga wa pixa gimretlo xangognenanu kiglero winga.”

¹¹Tyenwa muchinanu getkaluru kamruta Geso Kanaya, Kalilesretaya. Rekakgigoyaknuta. Ga wa yimaklene galixlu. ¹²Wale gowukshini yopika. Kapernawo yatka Wale ga wa runro, ga wa repurune, ga wa yimaklene. Gi gixgogne wane rawna.

Geso powratlu kpashiwakapji

¹³Gi gowukatkalu Tsru Giknoglughogne Goteyonenu. Gerosale kanika Geso. ¹⁴Kpashiwakapji retyana wakane gishanretjetachine, ga wa gowegane gishanretjetachine, ga wa motkokone gishanretjetachine, wanepnute gipekserojiprojakkachine tuplatachine. ¹⁵Kochipjerewapitsa

kamruta. Kpashiwakapiji rerutyana pejnuruneko, ga wa gowegane, ga wa wakane. Rupkakyanna serojiprojna wa kgipekoklerune. Yawnajkaklo gikwalna.¹⁶ Motkoko gishanretjetachine wane china, “Gkoshpakanro wala gewiya. Gi wa Nurupjiko marnewakapji gkamrutini.”

¹⁷Giyagni yimaklene gishinkaplu yonatkalurni: **Wane nixa jmerpotno pupji chinanu.**

¹⁸Wa Goteyone wane chinru, “¿Klu getkaluru pekagitwu wa tye pkamrutini?”

¹⁹Rugita Geso. Wane chinna, “Gnikatanru tye kpashiwaka potu, ga wa mapgogne chininri ntunotakanru.”

²⁰Giyagni wane chinna wa Goteyone, “Gepkoxamkojmole patsrujire walapu kamrupjinatkaluru tye kpashiwaka potu, ga wa Pixa ɬmapgognepje ptunotakanru?” ²¹Seyni Wale wane chinyegitlu gimanepirana kpashiwaka potu. ²²Giyagni wa yotunotinitka gipnachinetskalaya, yimaklene gishinkaplu wa wane chinjenatinri. Ralixluna wa yonatkaluru, ga wa Geso chinyawaka.

Geso gimatgajitna pejnuruneko

²³Tsrū Giknoglushgogne, meyiwlugogne, Gerosale rawanatini gixo galixiwakatlu. Retanatluna wa getkalurkaka kamrutini. ²⁴Waleko Geso gi gaponshinikanyegitnawa wannayegiya, gi rixanu Wale gimatna pejnuruneko. ²⁵Gi wa magatyá wa satu gipgjuttyaplu yineru, gi rixanu Waleko gimatu yineru gaji gwachri.

Geso ga wa Nikotemo

3 ¹Wanenanru jeji satu Gwariseyo, Nikotemo giwakatletachri. Goteyone gitsrukate. ²Tyenwa goyechno yayegitlu Geso. Wane chinru, “Rawi,

wumati Goyakalu yegi ginyachriyi yimaklewatachri pixinripa. Gi rixanu gike gimkata kamruretlu tyekaka getkaluru wa Pixa kamrutanrukaka waleyma ma mixkanumka Goyakalu.”

³Rugita Geso. Wane chinru, “Galikakni, galikakni wane nchinyi, wa mumepe gishpakletkatu gi rumkata getletlu Goyakalu pogirewatyawaka.”

⁴Nikotemo wane chinru, “¿Gi rixpoko gishpakletatnaka satu jeji tsrutolejatinak? ¿Rumkatge gimepe jiglokletanutnaklu runronanwaka, rushpakinripatnaka?”

⁵Rugita Geso, “Galikakni, galikakni wane nchinyi, satu ma wugenetikmaka gonuya ga wa Giwekikaluruya, gi rumkata jiglokletanru Goyakalu pogirewatyawaka. ⁶Gi wa manchi gishpakyachri manchini wale, ga wa Giwekikaluru gishpakyachri, giwekikalurni wale. ⁷Gi wa puglajitanu wa wane nchinyayi, gimkata gimepe gishpakletanutnaka. ⁸Wa kannipgyalu ginakakta raluka wane yannipgyata. Pyijnakpogimnutlu, seyni gi pumata ginakakta runya, ga wa ginakakta yanu. Wane rixa pejnuruko Giwekikaluru gishpakyachri.”

⁹Rugita Nikotemo. Wane chinru, “¿Gi rixpoko wane gixkotanu?”

¹⁰Rugita Geso. Wane chinru, “¿Pixni wa Gisrayiline yimakachriyi, ga wa gi ge pumatlu tyekaka? ¹¹Galikakni, galikakni wane nchinyi, wa wumatanru wane wchina, ga wa wetanru wupgjutata. Gi gyoptotlu wupgjutatanru. ¹²Wa nunkakingi tyechijne gajerupirankaka, gi galixa, ¹³gi gixpokotyawaka galixini wa tengogne gajerupirankaka nunkakingi? ¹³Gike gatskotlu tengogne, seyni wa tengogne gjirukyachripje, Gita wa Yinera Wgenno tengognerutno. ¹⁴Moysisi pixka yotunkakinri wa gimnu yineru

mwiyawakanuya, waneko pixka nixa: numkata yotunkaakotanu Gita Yineru Wgenno. ¹⁵Wa pejnruruneko nalixjene ma mamginitipa, seyni waneyapna ruwekinrina gike rixiniko mnikawnakatu.

Ralukyapogna Goyakalu tye psolchijne gajeneko

¹⁶“Wane rixa galuklepotutna Goyakalu tye psolchijne gajeneko, giyagni renekna satupjerutu Gituru, wa pejnruruneko ralixjene ma mamginitipa, wa waneyapna ruwekinrina gike rixiniko mnikawnakatupa. ¹⁷Gi rixanu Goyakalu gi yokanatlu Gituru tyechijne ruklukanuwnayegjixyapna tye psolchijne gajeneko, seyni wa tye psolchijne gajeneko gognetkakikolupa Wale chinanu. ¹⁸Wa Gita galixachri gi ruklukanuwnayegjixko. Seyni malixakletu ruklukanuwnayegjixkanatka gi rixanu gi ralixgiwakatno Gita Goyakalu Wgenno satupjerutu. ¹⁹Tye chinanu Goyakalu giklukanuwnayegjixanru yineru, wa tye psolchijneko runa pokamlalu, ga wa yine galukpotutlu mapshagwaka pokamlalu pnuate, gi rixanu mugletni wa kamrurna. ²⁰Wa pejnruruneko mugletu kamrutachine gagnanutlu pokamlalu. Gi wa pokamlalu yegi yana ma mekagi giklukanuwnaletikotupna kamrurna. ²¹Wa poyagkakachrii yayegitlu pokamlawaka, rekakgi kamruretikolupa Goyakaluya wane gixka.”

Gnunrowatachri galukjeru

²²Wanepnute Gotechijne ya Geso yimakleneyma. Wane rawjenatini wannayma. Katlewjixa. ²³Katlewata koxa Gwa Genoya, Sali Pokchistsi, gi rixanu wane rawa gixo gonu. Wane yana. Katkalune. ²⁴Gi rixanu gi wa yoshmaklewjetikwaka rutaakawa Gwa.

²⁵Gwa yimaklene gigjekaka satu Goteyoyma powratjetikwakipiranaya. ²⁶Yayegitluna wa Gwa. Wane chinruna, “Rawi, wa Gorta wakanute pixaymalutunanu, wa pupguitjajenatanru, petanru, katlewjixa. Ptowrunpotunanuko yayegitlu.”

²⁷Rugitna Gwa. Wane china, “Gike rumkata yoptoleta yineru, seyni walepje wa Goyakalu genekyalu. ²⁸Gixakni wa nupguitjengi wane nchinre, ‘Gi wa Kristono gita,’ seyni gitni wa yokanatkalurno Kristo penutete. ²⁹Wa gnunrowatachri walenwa kganunrolu, Kristo pixka waneylu ralixjene. Wa gnunrowatachri galukjeru, walestsi gwachri, pixka nixa gita. Ralukjeru yijnakotlu gnunrowatachri tokanu, ga wa rumuwpotuta tokanu chinanu. Waneko pixka nixa gita. Numuwpotuta Kristo chinanu. ³⁰Rumkata tsru gixleta Wale, ga wa gita giyagokananumtanu.

Teno giyakatyachri

³¹“Ga wa teno giyakatyachri pejnruruneko pnute tsruni Wale. Ga wa chiji giyakatyachri, chiji gjerni wale. Tye chiji gajerupirana runkakleta. Ga wa tengogne giyakatyachri pejnrune pnute tsruni Wale. ³²Ga wa retanru, ga wa yijnakotanru Wale rupguitata. Gike yopto gipguitaletlu. ³³Yopto gipguitaletjeru runkakpokowakyegitlu wa Goyakalni wa poyagkakachri. ³⁴Gi rixanu wa Goyakalu yokanatanru, Kristo, Goyakalu tokanu runkakleta. Gi rixanu gi reneklu Goyakalu Giwekkaluru kyagolu. ³⁵Ruru galuklu Gituru. Ptowrunanuka reneklu gimyoya. ³⁶Wa Goyakalu Wgene galixachri waneylu ruwekinri gike rixiniko mnikawnakatu. Seyni wa Goyakalu Wgene malixkatu gi retanru ruwekinri, seyni Goyakalu jigekanuwyeeegognenatlu.”

Gakowni jitotkomgalesti tuplatinri Geso

4 ¹Giyagni wa Geso gimatlwa wa Gwariseyone yijnakyegitlu Gwa pnute rixna yimaklene Geso. Katlewixna. ²Gimka katlewata Geso, seyni yimaklenepje katlewata. ³Giyagni Gote rushpkaya. Kalile satokanutnaka.

⁴Samarya rumkata yaplemta. ⁵Giyagni wane rapoka papokchi Samarisreta, Sicha chinkaluru pokchi, wanestsi wa Gakowo genekchijityalu gituru Gosi. ⁶Waneru Gakowni jitotkomgale. Giyagni Geso gama yagapleta. Wane tuplata gitkomgastsi. Tumananutkani.

Samari gajero

⁷Samari gajero sato suxo gina sajkapgatachropa. Wa Geso wane chinro, “Putanno.” ⁸Gi rixanu yimaklene pokchi yatkana. Ragjitapluna niikaluru.

⁹Samari gajero wane chinru, “¿Gi pixkatge Pixni Goteyyi pagitno wa nutyapyi, gitni wa Samari gajerno?” Gi rixanu Samaritanoneyma gi rumatletkakna Goteyone.

¹⁰Rugita Geso. Wane chinro, “Pixamka gimatantu Goyakalu genekashle ga wa Girni wa wane pchinjeru, ‘Putanno,’ pixa gagjitanmaklu Waley. Walemka genekanyi gonu giwekachri.”

¹¹Suxo wane chinru, “Gitokopna rawatkomgata. ¿Ginaka pguta waneyyi wa gonu giwekachri? ¹²¿Pixlege wa wutsrukati Gakowni pnute tsurayge, wa tyetkomga wenekjerni, waleni koxa giiru, ga wa wugenene, ga wa giprane?”

¹³Rugita Geso, “Pejnuruneko tye gonu girachine, rumepe gonunnagatlewletanatnakna. ¹⁴Wa girukta girinri wa gonu Gita genekyaplu gi pagogneko ronunnagatewatanutnaka. Seyni wa gonu Gita genekyaplu

gonutkomga pixka rixnanwakatanu, rushpakgatinri ruwekinri chinanu gike rixiniko mnikawnakatupa.”

¹⁵Suxo wane chinru, “Nutsrukate, penekanno tye gonu, gikeknigi nonunnagatewatanutka. Gi koxa gewi nsajkapinitka.”

Goyakalni Giwekikaluru

¹⁶Geso wane chinro, “Ptomgapanru pganuru. Ginanu gewi.”

¹⁷Suxo gigita. Wane china, “Gi kganurno.”

Geso wane chinro, “Wanepotuko pchnina, ‘Gi kganurno,’ ¹⁸Gi rixanu pamyo pganurtapa. Ga wa xani wanerutu pganurmaka, gi wa pganurni. Galikakpotunaru wane pchinno.”

¹⁹Wane chinru suxo, “Nutsrukate, netyi tokanchi geneklewatachriyi.

²⁰Wutsrukateni tye magkate yonogyegitni. Wa gixa wane china, Gerosale gimkata yonogjetikwaka rixinripa.”

²¹Wane chinro Geso, “Suxo, palixanno, gipapko ginanu, gi wa tye magkateko, gi wa Gerosaleko gixa yonogyegitanru Girchi. ²²Gixa yonogyegitlu gma mumatanatu. Wixa yonogyegitlu wumatanru. Gi rixanu Goteyone yegi ruyakatya gognewatikaluru. ²³Seyni gipapko ginanu, xawaknitkani, wa galikakpotunaru kyonogiklerune yonogyegitanruna Girchi psolu rajyakoyna, galikakpotunaru. Gi rixanu Girchi gjigakoxna wane gixachine yonogyegityapluna. ²⁴Goyakalni Giwekikaluru, ga wa yonogyegitjene Giwekikaluruya galikakpotunaru, rumkata yonogyegletluna.”

²⁵Wane chinru wa suxo, “Numata gita wa Mesiya gininripa—Walena Kristo chinkaluru—wa Wale gininipa runkakanwu ptowrukopirana.”

²⁶Geso wane chinro, “Walekno Gita giynumsatyi.”

¿Kristo getkokatkanwa Wale?

²⁷Wane rixanatawa rapokna yimaklene. Ruglajitna wa suxo ruynumsanatinri. Seyni gi satuna wane china, “¿Klu paluka?” waka “¿Klu puynumsatyalo wala?”

²⁸Giyagni wa suxo tuknokgashgajremtaka. Pokchi tyatka. Wala wane chinna jejine, ²⁹“Ginanu. Getapanru satu jeji, wa pejnuruko nixyawaka nchinjeru. ¿Kristo getkokatkanwa Wale?”

³⁰Giyagni pokchi yiayatkana. Yayegitluna Wale.

Jirgikolu

³¹Wanekopshini ragjtluna yimaklene. Wane chinruna, “Rawi, pnikanutka.”

³²Wale wane chinna, “Waneyno nnijitu nnikanrupa wa gixa mumatanutu.”

³³Giyagni wa yimaklene wane chinkakna, “¿Satu getko gwapnijitulu?”

³⁴Wane chinna Geso, “Nnijitni wa nkamrutanru nyokanatjeru gishinikanru, ga wa nnikatyaplu kamrure. ³⁵¿Gi ge wane nchina gixa, wa gepkoxamkoje ksuru magatiniwa rapokinripa wa jirgikolu? Giyagni Gita wane chinyagi, ntunogitanu. Getanru trikosha. Rutlikagwutatka jirgikolpatka. ³⁶Jirgachri yoptotlu wenutikolu.

Rapatjetlu wenutikolu gike rixiniko mnikawnakatupa, wa gitakachri koxa ga wa jirgachri koxa rumuwatinripna. ³⁷Gi rixanu tye chinanu galikakpotunanni wa tokanchi, ‘Satni wa gitaklewatachri, ga wa satni wa jirgachri.’ ³⁸Wa Gitni wa yokanatgi gjirgiyaplu wa gixa ma kamruretanutu. Pimrine yaprewpotuta, ga wa gixa kashrigna wanna kamrurenantu.”

Gixo Samari gajene galixa

³⁹Wa gixo Samari gajene wale pokchi gajene galixlu suxo tokanu chinanu, gipgujtalewatachro. Wane china, “Runkakyano pejnuruko nixyawaka.”

⁴⁰Giyagni Samari gajene runyeginititkaluna, ragjtluna wane rutukinripachi. Wane rutuka gepgogne.

⁴¹Gixo wanepnute galixa Geso tokanuya.

⁴²Wane chinrona suxo, “Gi wa ptokanuya walixatka, gi rixanu wixpotuko jematkalu. Wumata galikakpotunaru rixinri Tyenwa wa tye psolchijne gajeneko gognetkakachripatka.”

Kalile yatnaka Geso

⁴³Gepgogne chininri wane rushpkaya. Kalile yatka. ⁴⁴Gi rixanu Waleko Geso gipgujtatlwa tokanchi geneklewatachine gichijneyna gi wa kagwakpiratikna. ⁴⁵Giyagni Kalile rapokinitka, wa Kalile gajene yoptotlu, gi rixanu wa Gerosaleya retjetluna pejnurkakako wa tsrugogne kamrutanru. Gi rixanu wanna koxa wane ya meyiwlw yegi.

Pogirchi gitakanru wgene gituukaaka

⁴⁶Giyagni Kana yatnaka Geso, Kalilesreta, wa gonga winga kamrutyawaka. Kapernawo rawanata satu pogirchi gitakanru. Wale wgene yayixa. ⁴⁷Wale yijnakyeginititkalu Geso Gote ruyakatyatka. Kalile rapokatka. Geso yegi ya. Ragjtlu yopikinripa rutuukakyaplu gituru, gi rixanu rupnakastsinatkani. ⁴⁸Giyagni Geso wane china, “Gma metkamkalu getkalurkaka, ga wa koglajrukaka, gi galixanu.”

⁴⁹Pogirchi gitakanru wane chinru, “Nutsrukate, pyopikanu ma mupnakanuwa noturu.”

⁵⁰Wane chinru Geso, “Pyanutka. Puturu giweka.”

Wa jeji galixlu wa tokanchi Geso wane chinyalu. Yatka. ⁵¹Wa yopikamtinitka wayegrene gishpakamta yoptotpatkaluna. Runkakluna. Wane chinruna, “Puturu giweka.”

⁵²Giyagni repomgana gipapko yinuwaka giglewleta. Wane chinruna, “Kapetgogne rutmayitini, rupachwalgatka.”

⁵³Giyagni ruru gimatlwanepapkonwa Geso wane chinru, “Puturu giweka.” Ralixa wale, ga wa pejnjuruneko gipji gajene.

⁵⁴Wa tye gepi chininri getkaluru kamrutatnaka Geso, Gote ruyakatininitka. Kalile yinitka.

Yayixachri, Wetesta gajeru

5 ¹Wanepnute meyiwlugognetnakni Goteyonenu. Gerosale kanika Geso.

²Wa Gerosale, gowegane gipgyaptotesti, waneru kawjetikwaka. Gewreyone tokanu wane chinika Wetesta. Wale waneya pamytamnukaka. ³Wane ruklugna gixolune yayixachine, maygalene, yokmatachine, giprigmanetachine. Kagwakluna rakaykokgatkolupa gonu. ⁴Gi rixanu gipapko gapokini Gitsrukaachitowreru gjrukini kawjetikwaka. Rakaykokgatlu wa gonu. Rali gakaykokgatkoklunutka wa gonu, muchinanu gjrukgtachri kawjetikowakaya, wale gituka gi gixachrikokta yayixlu chinanu. ⁵Wanenanru satu jeji mapamole yokgipi walapu yayixachrinatka.

⁶Wa Geso getinri tye giklugachri, wa rumatinri gowukshini potu wane rawinri, wane chinru, “⁷Paluka giglewlette?”

⁷Rigitlu wa yayixachri, “Gitsrukaachi, maleshayanno jeji nyoshmakjerupmaka

wa kawjetikowaka wa rakaykokgatkoklunupa gonu. Wa nunakopshini gita satu gjrukata muchinanu gitaya.”

⁸Wane chinru Geso, “Pyotunotanu. Pkoschekjekotanu. Pyanutka.”

⁹Waneklu ruglewatatka jeji. Koschekjekotatka. Yanamtatka.

Geso jigyegitka wa gapnanutikalurgogne kaspukapgutatinri

Gapnanutikalurgognenwa walegogne.

¹⁰Giyagni wa Goteyone wane chinru wa gigletkalurutka, “Gapnanutikalurugognewani. Ginanshichkalurni wa panikjekotinripa.”

¹¹Wale gigitna, “Nugletjeru Walepotuko wane chinno, ‘Pkoschekjekotanu. Pyanutka.’”

¹²Giyagni repomaluna, “¹³Giru jejni wa wane chinyi, ‘Pkoschekjekotanu. Pyanutka?’”

¹³Wa gigletkalurutka gi gimatlui gixachritkani. Gi rixanu Geso gixrikamta, gi rixanu gi gepikna yine wane.

¹⁴Wanepnute kpashiwakapji Geso gikshikyalu. Wane chinru, “Petinwa. Pugletikolutka. Gi wa wanepnuteko pmukochirewatanutka, wane pnuterutu ma munyegityanpatkayi.”

¹⁵Wa jeji galimta. Runkakapna Goteyone, Gesoktanwa rugletjeru.

¹⁶Wale chinanu wa Goteyone kojwakananumtlu Geso. Raluka giylaletluna, gi rixanu wa tyekaka kamruta gapnanutikalurgogneko. ¹⁷Wa Geso wane chinna, “Xangognenanu kamrurewata Nuru, ga wa Gita koxa kamrurewata.”

¹⁸Giyagni wale chinanu pnute raluka giylaletluna Goteyone, gi rixanu gi wa gapnanutikalurgognepje gi rapnanuta, seyni wane china Ruru potu rixinri Goyakaluko pixka rixnawa.

Goyakalu Wgene gitakikolu

¹⁹Giyagni Geso gigita. Wane chinna, “Galikakni, galikakni, wane nchingi, gi ke rumkata kamrureta Walepje rixini Gituru, seyni wale rumkata wa Ruru reta kamruretanru, gi rixanu klunerukta kamruta Goyakalu, Gituru koxa waneko pixka gixa kamruretlu. ²⁰Gi rixanu Girchi galuklu Gituru. Rekagtilu pejnurkakako Wale kamrutanru. Tyekaka pnu te tsru kamrurchi rekagitanru wa gixa giglajitinripa. ²¹Gi rixanu Girchi wane gixa yotunkakletna gipnachine. Ruweekakna. Waneko pixka koxa rixa Gituru. Girukokta laruka giweekakleta, ruweekaklu. ²²Gi rixanu Girchi gikena ruklukanuwnayegjixa. Seyni pejnuruko giklukanuwnayegjixlelu reneklu Gituru. ²³Kagwakpiratyapluna Ruruko pixka wa Gituru wa pejnuruneko. Wa Gituru mkagwakpiratkatu, gi koxa kagwakpiratlu Girchi wa yokanatjeru.

²⁴“Galikakni, galikakni wane nchingi, ntokanu yijnakotachri, nyokanatjeru galixachri waneylu ruwekinri gi ke rixiniko mnikawnakatu. Maleshayaplu ruklukanuwninripa. Gipnaluya rushpakamtya. Jigloklu giweklu. ²⁵Galikakni, galikakni wane nchingi, rapokanu gigogne, xawaknini wa gipnachine yijnaktokanutinipno Gita Goyakalu Wgenno. Yijnakotachine giwekanu. ²⁶Gi rixanu Girchi waneylu giweklu Walenanuko. Reneekoxlu Gituru waneko pixka nixinripa wa waneyapno giweklu Gitananuko. ²⁷Rutaakoxno nuklukanuwnayegjixlewinripa gi rixanu Yineru Wgenno.

²⁸“Gi giglajitanu tyeya, gi rixanu rapokanu gigogne wa pejnuruneko yomlechi gwachine yijnaktokanutanno. ²⁹Kigleru kamrutchine gishpakanu

yotunruyapa ruwekinripna. Wa gektutu kamrutchine yotunotanna ruklukanuwnayegjixkolupna.

Kristo gipguitatchine

³⁰“Gike numkata kamrureta Gitapje nixin. Nyijnakotyawaka waneko pixka nixa giklukanuwnayegjixlewleta. Wanepotukni wa nuklukanuwnayegjixlewle. Gi rixanu gi nujgalu Gitako nushinikanru, seyni wa nyokanatjeru gishinikanru. ³¹Wa Gitnanuko gipguitatinwa, wa nupguitalewle gi wa galikakpotunanni. ³²Satni wa gipguitatno. Numata Gita wa rupguitatanru Gitaya wanepotukni wale. ³³“Gixa yokanatna yine Gwa yegi. Wale gipguitatlu galikakpotunamu tokanchi. ³⁴Gi wa nyoptotlu wa yineru gipguitalewle. Seyni tyekaka nchina wa gixa gognetkakikolupa. ³⁵Gwanwa katalu xirnachri, pokamlatachri. Wa gixa galuka gimuwlepotuta pshinitsonu pokamlanuya.

³⁶“Waneyno Gita tsru potu gipguitalewlu Gwanu pnu te. Gi rixanu Girchi genekyano kamruchi npoyagkakinripa. Waleko kamruchi nkamrutanru, waleko gipguitatno wa Girchi yokanatno. ³⁷Wa nyokanatjeru Girchi Walekni gipguitatno Gita. Gi pagogneko gjemaplajitlu gixa. Gi koxa getgetkowakatlu. ³⁸Gi koxa waneygi tokanu gaji gwachri. Gi rixanu Goyakalu yokanatanruno, wa Gita gixa ma malixanutno. ³⁹Getjepotutanru yonatkaluru tokanchi, gi rixanu gixa kagwaka waleya waneyapgi giwekinri gi ke rixiniko mnikawnakatu. Wale tokanchinwa gipguitatno Gita. ⁴⁰Gixa gi galuka ginyeglelno waneygi gixinripa giwekinripa.

⁴¹“Gi nyoptotlu gimalwuru yineya.

⁴²“Seyni Gita gimatyegitgi wa maleshaygi Goyakalu galuklelewle gixa

gwachri.⁴³Gita gina Nuru giwakaya. Gi gyoptotno. Satumka ginanu waleko giwakaya, wale gyoptotanu.⁴⁴Gi gixpoko galixleta gixa, gixkakluko gimalwukakinri? Gi gjigalu wa satupjerutu Goyakalu kigle getle rixyapgi.

⁴⁵“Gi wa gyanshinikanutanru wa Gita jigyegitangi Girchiyegiya. Waneru gjigyegitjerupa. Moysisni wa gixa kagwakanshinikanutanru.⁴⁶Gi rixanu gixa galixanmaklu Moysisi, gitkoxmaka galixanu. Gi rixanu Gitapirana yonyegita wale.⁴⁷Gma malixiniplu wale yonatanru Ɂgi rixyawaka galixtukanutinno?”

Pamyo waragkane reta nachneta

6 ¹Wanepnute Kalile tsru wenne wakanute yatka Geso. Walenwa Tiwerya wenne.²Gixolune yine gomkagitlu, gi rixanu getkalurkaka retna, Wale kamrujetanru yayixachinea.³Magka kanika Geso. Wane tuplata yimakleneyma.⁴Gi gowukatkalu Tsru Giknoglushgogne, Goteyone meyiwatinrigogne.

⁵Giyagni tunogiygaleta Geso. Retna gixolune yine ginyegityawaklu. Geso wane chinru Wilipi, “⁶Ginaka wagjitapinro Jimapro wa nikinripna wanna?”⁶Yantaletyalu wane chintokanuta, gi rixanu Wale gimatlukamrutanrupa.

⁷Wilipi gigitlu, “Gepi pacha wenroluto Jimapro gi poyagotanu satkaka ptsotsotajkaka yopto tinripna.”

⁸Satu yimakleru Gantirishi, Simo Petro gepuru, wane chinru,⁹“Gewlu satu mturu waneylu pamyo Jimapro triko pixkalutu kamrutikaluru, ga wa gepi shima. Seyni Ɂklu kigleylu wane pejnurune chinanu?”

¹⁰Giyagni Geso wane china, “Ntplakakanna yine.”

Waneru tsru peklomta. Tuplatna. Pamyo waragka getko jejine.¹¹Giyagni Geso gwalo Jimapro. Rali poyagnutletinri, Wale geneksatna yimaklene. Wa yimaklene geneksatna tuplattachine. Waneko pixka rixlo shima ralukywakpotukna.

¹²Wa jinanu rixinikana, wane chinna yimaklene, “Gapatjetanru wa gixetachri psokaka gike ma salewninitipa.”

¹³Giyagni rapatjetluna. Pamole gepi kojita tsepota psokaka wa pamyo Jimapro triko pixkalutu kamrutikaluru, ruxetanruna nikanatachine.

¹⁴Giyagni wa jejine getinri getkaluru wa Geso kamrutanru, wane chinna, “Tyenwa galikakpotunanu tokanchi geneklewatachri tyechijne ginachripa.”

Tsru wenu gogote yapamta Geso

¹⁵Giyagni rumatini Geso wa rushinika kashretyapluna pogirna rutakyapluna, ruxrikamtatnaka. Magka ya Walepje.

¹⁶Kayi chininitka. Yopikamtina. Wenu yana yimaklene.¹⁷Kanawa ruptekna. Tsru wenu wakanute, Kapernawosreta, yanna. Mapshagatkalu. Gi wa runyegitawana Geso.¹⁸iGi psoshpurgananuktalu tsru wenu, tsru rawokannipgyale chinanu!¹⁹Giyagni ranikgatnimatkana. Gepi warakastsi, mapa warakastsi getko gowuknu yatkana. Retluna Geso. Tsru wenu gogote yapamta. Gi gowukatkalu kanawa yegi. Pikanna.

²⁰Wa Wale wane chinna, “Gitni. Gi mpikanu.”²¹Giyagni raluka yoptoltapluna kanawaya. Wanekluyakawa tutspaka kanawa rushinikywakna chiji.

Gixolune yine gjigalu Geso

²²Waleprika gixolune yine tsru wenu wakanute gwachine getlo maleshlo sato wanepnute kanawa. Satopjero. Ga wa

Geso gi gipteklo wala yimakleneyma. Wa yimaklenepje yatka.²³ Seyni wa Gitsrukaachi gali poyagnutletlo jimapro, Tiweryawnaga tuknogamtya kanawkaka. Tiwerya giyakatyachrokaka.²⁴ Giyagni wa gixolune yine geta gi wa Gesoko wanetka, gi wa yimakleneko. Wane retinitkana gixolune yine, kanawa ruptekatkana. Kapernawo yatkana. Wane rujgyiatkaluna Geso.

**Galikakpotunanu tengogne
giyakatyachri jimapro**

²⁵Tsrus wenu wakanute rukshikinitkaluna, wane chinruna, “Rawi, ¿Giklu papokatka gewi?”

²⁶Rugitna Geso. Wane chinna, “Galikakni, galikakni wane nchingi, gi wa gjoggano getkalurkaka getinri chinanu, seyni wa jimapro gnikinri ga wa jinangi gixinri chinanu gjoggano. ²⁷Gksamrurewatanu gi wa niikaluru gamgachri chinanu, seyni wa waneyapgi gwagognenatachri giwekinri mnikawnakatupa niikaluru chinanu gksamrurewatanu. Walenwa Gita Yineru Wgenno genekangi. Gi rixanu Girchi, Goyakaluko gimaxikoletno Gita.”

²⁸Giyagni wane chinruna, “¿Klu wkamrutantu wa Goyakalu kamrure wkamruretinripa?”

²⁹Rugita Geso. Wane chinna, “Tyenwa Goyakalu kamrure, wa gixa galixyaplu Wale yokananantu.”

³⁰Giyagni wane chinruna, “¿Klu getkaluru koxa pkamruta Pixa wa wetyaplu, wa walixyapyi? ¿Klu pkamruta? ³¹Wutsrukateni niklo mana yineru mwiyawakanuya, yonchi chinyawaka: Jimapro tengogne giyakatyachro roglutna.”

³²Wane chinna Geso, “Galikakni, galikakni wane nchingi, gi wa Moysisi genekgi wa tengogne giyakatyachro

jimapro, seyni Nuru genekgi wa galikakpotunanu tengogne giyakatyachri jimapro.³³ Gi rixanu Goyakalu jimapro Walenwa tengogne gjirukyachri, tye psolchijne gajeneko genekgiwekletachri.”

³⁴Giyagni wane chinruna, “Gitsrukaachi, penekjetanwu tye jimapro.”

Geso, wa jimapro giwekikaluru

³⁵Wane chinna Geso, “Gitni wa jimapro giwekikalurno. Nunyegitjeru gi pagogneko nachiplu. Nalixjerupa gi pagogneko ronunnagatewatanu.³⁶ Seyni wane nchingi gixa, getmakno. Gi galixa.

³⁷Pejnuruneko Girchi genekyano ginyegitanno. Wa nunyegitjeru gi wa maleka nuknoklu.³⁸ Gi rixanu tengogne gjirukyachrino gi wa Gitako nushinikanru nkamrutinripa, seyni wa nyokanatjeru gishinikanru.³⁹ Tyenwa nyokanatjeru Girchi gishinikanru, wa pejnuruneko renekyano gi satuna gamganu, seyni nyotunkakanru ralipregognepatka.⁴⁰ Gi rixanu tyenwa nyokanatjeru gishinikanru, wa pejnuruneko Gituru getachine, Wale galixachine waneyapna ruwekinrina gi ke rixiniko mnikawnakatu. Gita yotunkakanna ralipregognepatka.”

Kegemgana Goteyone Geso chinanu

⁴¹Giyagni Goteyone kegemgayegitlu wane chinre chinanu, “Gitni jimaprono tengogne gjirukyachrino.”

⁴²Wane chinna, “¿Gi ge Gesokni wa tye, wa Gosi wgene, wa ruru, ga wa runro wumatna? ¿Gi rixkoxge wane china wa Tye, ‘Tengogne gjirukyachrino?’”

⁴³Geso gigita. Wane chinna, “Gi gkegemganu Gitaya gixkakluko.⁴⁴ Gi satuna gimkata ginyegletno Gita wa Girchi nyokanatjeru ma kosetanatu. Gita yotunkakanru ralipregognepatka.”

⁴⁵“Yonatkalurni tokanchi
geneklewatachine kirukateya: **Goyakalu yimakanna pejnuruneko.** Wa
pejnuruneko Girchi yijnakotachine,
yimaakalune runyegitnona. ⁴⁶Gi wa satu
getyalu chinanru Girchi, seyni Gitapje
Goyakalu yegi giyakatyachrino netlu
Girchi. ⁴⁷Galikakni, galikakni wane
nchingi, nalixjeru wale waneya
ruwekinri gike rixiniko mnikawnakatu.
⁴⁸Gitni wa jimapro giwekkalurno.
⁴⁹Gitsrukateni niklo mana yineru
mwiyawakanuya, ga wa rupnanatkana.
⁵⁰Gitni wa jimapro tengogne
gijruckyachrino, wa tye nikachripa ma
mupninitipa. ⁵¹Gitni wa jimapro
giwekkachrino, tengogne gijruckyachrino.
Girukokta nikiniplu tye jimapro
ruwekgognenatanu. Wa jimapro Gita
geneklepa walenwa nogitu neneklepa
ruwekinripna psolchijne gajene.”

Gesogitu ga wa gigraga

⁵²Giyagni Goteyone gejnugimyegkaka.
Wane chinna, “¿Gi rixpoko
genekletanwu Tye gigitu wnkyaplu?”
⁵³Wane chinna Geso, “Galikakni,
galikakni wane nchingi, gma niikanuplu
nogitu, Gita Yineru Wgenno ga wa gma
muragragatkanuplu nograga,
maleshayapgi giwekinri gixa gwachri.
⁵⁴Wa nnikgitutjeru, nuragragatjeru
waneylu ruwekinri gike rixiniko
mnikawnakatu. Gita yotunkakanru
ralipregognepatka. ⁵⁵Gi rixanu nogitni
wa galikakpotunanu niikalurni, ga wa
nograda galikakpotunanu girkalurni.
⁵⁶Wa nnikgitutjeru, ga wa
nuragragatjeru Gita rawa. Wale Gita
gwa. ⁵⁷Wane rixa yokanretno Girchi
giwekkachri, ga wa Girchi chinanu
nuweka, waneko pixka rixa wa nnikjeru.
Wale koxa giwekanu Gita chinanu.
⁵⁸Tyenwa jimapro tengogne
gijruckyachri. Gi wa gitsrukateni pixka

rixa, wa mana nikna. Wa
gipnachinenatkani. Wa tye jimapro
nikachri giwekgognenatanu gike
rixiniko mnikawnakatu.”

⁵⁹Tyekaka wane china
ginkaklewwakapjiya, Kapernawo Pokchi
runkaklewanatya.

Wa Giwekkaluru Walenwa geneka giwekklerewatachri

⁶⁰Wa gixo yimaklene yijnakonatinri,
wane chinna, “Kgimlu tye tokanchi.
¿Katu gimkata yijnakletlu?”

⁶¹Wa rumatini Geso Walenanuko wa
yimaklene kegemginri tye tokanchi
chinanu, wane chinna Wale, “¿Tyerge
gitspeakagi? ⁶²¿Gi gixpokotanu wa
getinipno Gita Yineru Wgenno teno
nyinipa muchinanu nwanatyawaka?
⁶³Wa Giwekkaluru Walenwa geneka
giwekklerewatachri. Wa manchi gike
gaprini. Wa tokanchikaka Gita
ginkakyagi, walenwa giwekkaluru ga
wa giweklu. ⁶⁴Seyni wanena pimrine
gixate wa malixkane.”

Gi rixanu Geso gimata
yinuwakikoluyakawa ginnaktanwa
malixkane, katupni wa samyokjerupa.
⁶⁵Wane china, “Wale chinanu wane
nchingi, gi satuna gimkata ginreta Gita
yegi ma muchichkanru Girchi.”

Tokanchi giweklu mnikawnakatupiranra

⁶⁶Wanepnute gixo yimaklene satkapa.
Gi wa Waleyma yanatkana.

⁶⁷Giyagni wane chinna Geso wa
pamole gepi, “¿Gi ge galuka yaleta
gixa?”

⁶⁸Simo Petro gigitlu, “Gitsrukaachi,
¿katyegmaka gayanu? Pixa waneya
tokanchi giweklu mnikawnakatupiranra.

⁶⁹Wixa galixa. Wumatyi wa Kristoyi
pixinri, Goyakalu giwekkachri Wgenyi.”

⁷⁰Geso gigitlu, “¿Gi ge ntsomitgi gixa
wa pamole gepirungi? Ga wa gixa satu

kamchini.”⁷¹Gota Giskaryote wa Simo wgenepiranni wane china, gi rixanu walepni wa samyokjerupa. Walenwa pamole gipirune rixinrina.

Ma malixlena Geso gepurune

7 ¹Wa wanepnute Kalile yapanata Geso. Gote gi raluka yapleta, gi rixanu Goteyone galuka giylaletlu. ²Gi gowukatkalu Goteyone meyiwatinrigogne, wa Gimajechrigogne. ³Repurune wane chinru, “Pyanutka gewiya. Gote pyanutka. Wa pyimaklene koxa getyaplu pkamrujetanru. ⁴Girukokta galuka kpogiru gixleta gi yogimatlu kamrure. Tyekaka pkamrutinri, pupgujetinwa psolchijne gajeneko yegi.” ⁵Gi rixanu gi wa repuruneko galixlu.

⁶Giyagni wane chinna Geso, “Nopapko gi wa rapokawa. Seyni waneygognenangi wa gipapko. ⁷Tye psolchijne gajeneko gi gimkata gayegixletgi gixa. Seyni Gita rayegixna. Gi rixanu Gita gipguitatna wanna wa mugletu kamruretinrina. ⁸Gixa kanikanu tye meyiwlu yegi. Gichi nkanikanu Gita tye meyiwlu yegi. Gi rixanu gi wa poyagkaakawa nopapko.”

⁹Wane chininitkana, Kalile rutukatka.

Gimajechrigogne meyiwluyeglu Geso

¹⁰Wa meyiwlu yegi kanikinitkana repurune, gowukshini kanikatka Geso koxa. Gi wa gipgujewnachri, seyni pocheru pixkako. ¹¹Giyagni rujgaluna Goteyone meyiwluyegiya. Wane chinna, “¹²Ginaklu wa Wale?” ¹²Tsru gixaxkaklu rixna gixolune yine Gesoya. Wa pimrine wane china, “Kiglerni.”

Pimrine wane china, “Gike. Seyni Wale yokwitna yine.”

¹³Seyni gi satuna pgujetawaka yanumsayegitlu Goteyone piklena chinanu.

Kpashiwakapji runkaklewatyia Geso

¹⁴Ganikaji meyiwlu kanika Geso. Kpashiwakapji ya. Wane runkaklewatyia. ¹⁵Giyagni ruglajitna Goteyone. Wane chinna, “¹⁶Gi rixpoko gimatletlu wa Tye wa yonchi? Gi wa yimaakalurni.”

¹⁶Geso gigitna. Wane china, “Nunkaklewle gi wa Gitanukni, seyni wa nyokanatjerunni. ¹⁷Girukta galuka kamruretlu nyokanatjeru gishinikanru rumatanru nunkaklewlepirana, Goyakalunrege waka Gitako notkanra. ¹⁸Waleko tokanu ginkakletachri, waleko rumalwutikolu rujga. Seyni wa yokanatjeru gimalwutikolu gjigachri, walena galikakpotunanu. Maleshaylu wale mpoyagkaknuchi. ¹⁹Gi ge Tokanchi Yukanatkaluru renekgi Moysisi, ga wa gixa gi satuna kamrulua Tokanchi Yukanatkaluru? ²⁰Kluneru chinanu galuka giylaletno?”

²⁰Yine gigita. Wane chinna, “Kamchi waneyyi. ²¹Katu galuka giylaletyi?”

²¹Geso gigitna. Wane chinna, “Satu kamrurchi nkamruta. Wa pejnurunekgi gixa giglajita. ²²Galikakni Moysisi genekgi wa sajruku gistiklelwu (seyni gi wa Moysisi runya, seyni wa gitsrukaachinni runya) ga wa gapnanutikalurgogne gixa sajruka gistikletlu jeji. ²³Wa gapnanutikalurgogne sajruka gistikolupa jeji wa Tokanchi Yukanatkaluru Moysisinu ma kaspukikotupa, ²⁴gimtuwnayegitnoge gixa wa gapnanutikalurgogne nutuukakpotutyalu satu jeji? ²⁴Gi gitakyagoklewatanu rixa getletikwaka chinanu, seyni wanepotuko gitakyagoklewatanu.”

¿Gi ge Walekni Kristo?

²⁵Giyagni wane chinna pimrine Gerosale gajene, “²⁶Gi ge Walekni wa

Tye wa raluka giylaletanruna?
²⁶Getanu. Gipgujewnachri yanumsata.
 Gike chinruna. ¿Rumatatkaluna xani
 galikakpotunanu tsrukakalune wa Kristo
 rixinri? ²⁷Seyni wa Tye wumatlú ginaka
 giyakatyachrini. Seyni wa Kristo
 gininipa gike gimata ginakakta
 ruyakatini.”

²⁸Giyagni kpashiwakapji
 runkaklewanatini Geso, sablewata.
 Wane china, “Gimatno Gita. Ginaka
 giyakatyachrino gimata. Gi wa Gitako
 nushinikanu nuna. Seyni wa
 nyokanatjeru galikakpotunanni Wale,
 wa gixa mumatanutu. ²⁹Gita gimatalu, gi
 rixanu Walenno. Ga wa Wale
 yokanatno.”

³⁰Giyagni raluka kashretluna, seyni gi
 satuna gomyokyegitlu gi rixanu gi wa
 gipapko gapokawa. ³¹Gixo Wale
 galixachine wane gixolunetskala. Wane
 chinna, “¿Wa Kristo gininipa,
 getkalurkakapa wa Tye
 kamrutanrupnutlege kamrutanu Wale?
 Gike.”

Gwariseyonetowrene yokanatka kashichyapluna Geso

³²Wa Gwariseyone yijnakotna
 gixolune yine kegemgiyawakna
 Walepirankakako. Tsrukakalune
 sasertotene ga wa Gwariseyone
 yokanatna gitowrenna wa
 kashichyapluna.

³³Geso wane china, “Pshinitsonuchi
 numwamtangichi. Nyokanatjeru yegi
 nyanutka. ³⁴Gijganmakno. Gi
 gikshikanutkano. Wa nwiyawakapa gixa
 gi gimkata yaletanu.”

³⁵Giyagni wa Goteylene wane
 chinkaka wannakakluko, “¿Ginaka
 rushinika yaletge wa Tye wma
 mukshikyanpatkalu? ¿Rushinika yaletge
 gitspalatachine, Krykonetskala
 gwachine yegi, runkaklewyegityapna

Kriykone? ³⁶¿Klupiranni wa tye wa
 Wale wane chinya? Wa, ‘Gijganmakno.
 Gi gikshikanutkano. Wa nwiyawakapa
 gixa gi gimkata yaletanu.’”

Gonu giwekachri yapgatyawaka pixka

³⁷Ralipregogne, tsru meyiwlugogne
 potu, Geso tunwata. Sablewata. Wane
 china, “Girukokta gonunnagatewata
 runyegitanno. Rurantu. ³⁸Yonchi
 chinyawaka, Gonu giwekachri
 yapgatyawaka pixka rixa gishpakletanu
 ginanwakaya nalixjeru.”

³⁹Giwekikalurupiranni china wa tye
 tokanchi, wa ralixjenepa yoptotanrupni
 Wale. Gi rixanu gi rapyegitawana
 Giwekikaluru Kpashiri, gi rixanu Geso
 gi wa royakawatyawaka jiglokawa.

Gixolune kotspalanshinikankaaka

⁴⁰Giyagni gixolune yijnakotinri
 tyepirana, pimrine wane china,
 “Galikakpotunanni Tyenwa tokanchi
 geneklewatachri.”

⁴¹Pimrine wane china, “Kristokni wa
 Tye.”

Pimrine wane china, “¿Kalilege
 ruyakatini Kristo? Gike. ⁴²¿Gi ge
 wanekni china yonchi wa Tawiklopisha,
 Wetle Pokchirge, Tawi gwanatyawaka,
 wane ruyakatinripa Kristo?”

⁴³Giyagni wannakakluko
 kotspalanshinikankakna gixolune Geso
 chinanuya. ⁴⁴Wa pimrine galuka
 kashretlu, seyni gikena gomyokyegitlu.

Gi pagogneko Wale pixka rixa ginkakleta satu yineru tye jeji pixka

⁴⁵Giyagni towrechine gapyegitna
 tsrukakalune sasertotene ga wa
 Gwariseyone. Wane chinkana
 towrechine, “¿Klu chinanu gi ganiklu?”

⁴⁶Wa towrechine gigita, “Gi
 pagogneko Wale pixka rixa ginkakleta
 satu yineru tye jeji pixka.”

⁴⁷Giyagni wa Gwariseyone gigitna. Wane chinkana, “¿Gixkoxnirge yokwitkanatka? ⁴⁸¿Ralixluge satu tsrukakalu, ga wa satu Gwariseyo? Gi ralixluna. ⁴⁹Seyni wa nyi gixolune, Tokanchi Yukanatkaluru mumatkane, kamakpiratkalunni.”

⁵⁰Wane chinna Nikotemo (Goyechno yayentapjeru. Walenwa Gwariseyone satute). ⁵¹“Tokanchi Yukanatkaluru wixanu gi giklukanuwneyegjixlu yineru ma muchinanu jempiranyegitkanwalu, rumatikolupa wale kamrutanru.”

⁵²Rugitluna Nikotema. Wane chinruna, “¿Kalile gajerkoxlayge pixa? Petjetanru. Pumatanru. Gi pagogneko Kalile rupgujewnnini tokanchi geneklewatachri.”

⁵³Satkaka gipji yatka.

Gimopatlewatachro

8 ¹Wa Geso Goliwa Magkate yatka. ²Goyechnokawpotuko kpashiwakapji yatnaka Geso. Pejnuruneko yine ginyegitlu. Tuplata Geso. Runkaklewyegitina.

³Wa yonchikgapine ga wa Gwariseyone ganiklo sato suxo Wale yegi. Tkashichka tumopatlewanyatyawakaya. Ganikaji rutaklona. ⁴Wane chinruna, “Yimaklewatachri, twu suxo kashichka tumopatlewanyatyawakpotukoya. ⁵Wa Tokanchi Yukanatkaluruya, Moysisi towutwu sotlujetikolupna wane gixachrone. Ga wa Pixa, ¿gi pchina Pixa?”

⁶Wane chinna yantaletyaluna rumkata jigyegleyapluna. Geso yonogimta. Chiji yonawata gimyojiya. ⁷Romkaga gepomsaletinitkaluna, potukawata. Wane chinna, “Girukokta gixa satu mmukochiretu, wale gapka ginkaganro sotluya.” ⁸Rumepe yonogletatnaka. Chiji yonawatatnaka.

⁹Wa yijnakotinitkana, yatkana. Satkaka yananumta. Muchinanu tsrutsoleji potu ga wa gapkatatachripotunanuko. Gesopje giknokamtkatka, ga wa suxo ganikaji gwanatachro. ¹⁰Potukawatatnaka Geso. Gi satuna retatka. Suxopjetkani. Wane chinro, “Suxo, ¿ginakatkana pjigyejigtjene? ¿Gikena giklukanuwneyegjixyi?”

¹¹Wala wane china, “Gi satuna, Gitsrukaachi.”

Geso wane chinro, “Gi Gitako giklukanuwneyegjixyi. Pyanutka. Gi wanepnuteko pmukochirewatanutka.”

Gesni wa tye psolchijne gajeneko pokamlatyegitachri

¹²Wa Geso yanumyegitatnakna. Wane china, “Gitni tye psolchijne gajeneko pokamlatyegitachri. Wa nomkagitjeru gi wa mapshagwaka yananu, seyni waneyaplu pokamlalu giweekaklewatachri.”

¹³Giyagni Gwariseyone wane chinru, “Pixnanuko gipguitatnawa. Wa pupguitaledle gi wa galikakpotunanni.”

¹⁴Rugita Geso. Wane chinna, “Gitnanukmaka gipguitatnawa. Nupguitalelew galikakpotunanni. Gi rixanu numata Gita ginaka nuyakatyga wa ginaka nyanu. Wa gixa gi gimata ginaka nuyakatyga wa ginaka nyanu.

¹⁵Wa gixa giklukanuwnejixlewata rixpokmanetyawaka. Gita gi satuna nuklukanuwneyegjixa. ¹⁶Gita giklukanuwnejixlewatinii

nuklukanuwnejixlewle galikakpotunanni, gi rixanu gi wa Gitapjeni, seyni Gita ga wa nyokanatjeru, Girchi. ¹⁷Wa Tokanchi Yukanatkaluru gixanu wane yonatika:

Gepi jejine gipguitalelele galikakpotunanni. ¹⁸Gitni wa Gitnanuko gipguitatnachriwano, ga wa nyokanatjeru Girchi gipguitatno Gita.”

¹⁹Wane chinruna, “¿Ginaklu Puru?”
Geso gigita, “Gi gimatno Gita, gi wa Nuruko. Gitamka gimatantu, Nurkoxmaka gimatantu.”

²⁰Tye tokanchikaka wane chinya Geso sroschi gignantakikwaka, kpashiwakapji runkaklewatini. Gi satuna kashichlu gi rixanu gi wa gipapko gapokawa.

**Niyawakapa Gita gixa gi
gimkata wane yaletanu**

²¹Giyagni rumepe wane chinretatnakna Geso, “Nyanutka. Gijganmakno, seyni gixapni gmukochire gimupnanuna. Niyawakapa Gita gixa gi gimkata wane yaletanu.”

²²Giyagni wane chinna Goteyone, “¿Walenanuklege giylatinwa? Giyagoka gonra wane china, ‘Niyawakapa Gita, gixa gi gimkata wane yaletanu.’”

²³Wane chinna Geso, “Gi wa teno gajengi gixa. Gitni wa teno gajerno. Gixni wa tyechijne gajengi. Gi wa tyechijne gajerno Gita. ²⁴Giyagni wane nchingi wa gmukochire gimupnanuna. Gi rixanu, gma malixkanupmakno Gita nixinri gmukochire gimupnanuna.”

²⁵Giyagni wane chinruna, “¿Gi gixachiri Pix?”

Wane chinna Geso, “Wa muchinanu nunkakyagi. ²⁶Waneyno gi gepika nunkaklepiranatyapgi, nuklukanuwnayegjixapgi, seyni wa nyokanatjeru galikakpotunanni. Wa Waleya nyijnakotinri Gita, wale nunkakleta tyechijneya.”

²⁷Wa Girchipirana runkakyana. Gi rumata jemluna ²⁸Giyagni Geso wane chinna, “Wa gixa yotukinpatkano Gita wa Yineru Wgenno, waneklu gimatantu kano wa Gita nixinri, ga wa gike nkamruta Gitnanuko, seyni wa Girchi yegi numatinri wale nunkakleta. ²⁹Gitaymalu wa nyokanatjeru. Gi rutspaltapyano Gitapje nixinri Girchi. Gi

rixanu Gita kamrujetlu rugleretjetyawaka.” ³⁰Tyepirana runkakletini, gixo galixlu Wale.

Galikakpotunau tokanchi koshpakanji

³¹Giyagni wane chinna Goteyone ralixjenetka, “Wa ntokanu gomkayegitini, galikakpotunau nyimaklenepgi. ³²Gixa gimatantu galikakpotunau tokanchi. Galikakpotunau tokanchi koshpakanji wayegrechne gma mixinitipa.”

³³Rugitluna, “Gawraklopishanwu wixa. Gi ke wayegrenenanwu, gi pagogneko. ¿Gi pchinkoxge Pixa, ‘Gishpakachinepgi?’”

³⁴Rugitna Geso, “Galikakni, galikakni, wane nchingi, wa pejnuruneko mukochri kamrutachine, mukochri wayegrenni. ³⁵Wa wayegrechri gi wa panchi rawgognenatanu. Wgenchi gwagognenatanu. ³⁶Giyagni wa Gituru koshpakinipgi, galikakpotunau gishpkachinepgi. ³⁷Numatgi Gawraklopishangi gixinri, seyni galuka giylaletno, gi rixanu wa ntokanu gi wa gwagi. ³⁸Gita ginkakletlu wa Girchistsi netinri, ga wa gixa kamrutlu wa girustsi gjeminri.”

Kamchi girutachingi

³⁹Rugitluna. Wane chinruna, “Wurni Gawrani.”

Wane chinna Geso, “Gawra wgenengi gixkamka, Gawra kamrujetanrumka gkamrutatu. ⁴⁰Gi wa xani galuka giylaletno, jeji tokanchi galikakpotunau ginkakjerno. Wale tokanchi Goyakalu yegi njeminri. Gi wale kamruta Gawra. ⁴¹Gixa kamrutlu girni kamrure.”

Wane chinruna, “Wixa gi wa gapoklewlu chinanu wushpkanya. Pagirupje waneywu. Walenwa Goyakalu.”

⁴²Wane chinna Geso, “Wa Goyakalu girutkamka, galukanmakno galikaka. Gi rixanu Goyakalu yegi tuyakatya Gita. Gewi napoka. Gi rixanu koxa gi wa Gitako nushinikanu nuna, seyni Wale yokanatno. ⁴³¿Klu chinanu gi gimata jemu nunkakletjetanru? Gi rixanu gi ginkata yijnakletlu ntokanu.

Gixni wa giru giyakatyachingi

⁴⁴“Gixni wa giru giyakatyachingi. Walenwa tsru kamchi. Giru getsotanrewle galuka kamrureta. Reyinuwakleyakawa kgiyialewaklerni wale. Galikakpotunanan tokanchiya mwakatni wale. Gi rixanu maleshaylu wale galikakpotunanan. Rayroklewatin, waleko rushinikanu china, gi rixanu kayrokterni. Gayroklu girmi. ⁴⁵Gixa gi galixno, gi rixanu Gita galikakpotunanan nchnina. ⁴⁶¿Katu wa gixa ginkata gekakgi giklukanuwnaletyano wa nmukochirewatinritka? Galikakpotunanan nchinini, ¿klu chinanu gi galixno? ⁴⁷Goyakalu yegi giyakatyachri yijnakotlu Goyakalu tokanu. Giyagni gi gyijnakotlu gixa, gi rixanu gi wa Goyakalu yegi giyakatyachingi.”

Gawrani mwakanuwa, Gitni

⁴⁸Rugitluna Goteyone. Wane chinruna, “¿Gi ge wanepotuko wchina wixa, wa Pixni wa Samari gajeryi, ga wa waneyyi kamchi?”

⁴⁹Rugita Geso, “Maleshayno kamchi, seyni nkagwakpiratlu Nuru, ga wa gixa mkagwakpiratkotu gixno. ⁵⁰Gi wa nujgalu numalwutikolupa. Waneru wa nujga gimalwuretjeru. Waneru kgitakyagoklewakleru. ⁵¹Galikakni, galikakni wane nchingi, ntokanu gomkagitachri gike rixiniko retanru gipukchi.”

⁵²Wane chinruna Goteyone, “Xawakni wumatanatkayi waneyyi kamchi.

Gawrani gipnana ga wa tokanchi geneklewatachinni. Ga wa Pixa wane china, ‘Wa ntokanu gimretachri gike rixiniko retumganru gipukchi.’

⁵³¿Pixlege wa wutsrukati Gawrani pnutepgutyi? Wale gipnachrinatka. Ga wa tokanchi geneklewatachinni gipnana. ¿Katu pixnawa Pixnanuko?”

⁵⁴Rugita Geso, “Gitnanuko gimalwutinwa, gike gaprini numalwure. Nuru geneknino numalwutikolupa. Walenwa wa gixa Goyakalute nchinanru. ⁵⁵Gixa gi gimatlu, ga wa Gita gimatlu. Gi numatlu, nchinanmaka Gita, gixa pixkamka nixanu kayroklerupmakno. Seyni numatlu. Numretatokanutlu. ⁵⁶Gawrani gitsrukati rumuwatni retgognetinno nogogne. Retlu ga wa rumuwatni.”

⁵⁷Giyagni wane chinruna Goteyone, “Gi pamymole walapuunawayi. ¿Petnirge Gawrani?”

⁵⁸Wane chinna Geso, “Galikakni, galikakni wane nchingi, Gawrani mwakanuwa, nwatka Gita.”

⁵⁹Giyagni koscheksortletna sotlujetyapluna. Wa Geso yogimata. Kpashiwakapji rushpakanmyta.

Jeji rushpakiniyakawa maygaletu rutuukaka Geso

9 ¹Wane yapamtini Geso retlu satu jeji rushpakiniyakawa maygaletu.

²Yimaklene gepomgalu. Wane chinruna, “Rawi, ¿katu mukochirewata, waleko waka rurune, wa maygaletu rushpakinriya?”

³Rugita Geso, “Gi tyeko mukochirewata, gi wa ruruneko, seyni wa Goyakalu kamrure gipgujewinripa waleya. ⁴Numkata kamrurewleta wa nyokanatjeru kamrurkaka gogikopshini. Goyechno gina. Waneklu gikeko ginkata kamrurewleta. ⁵Tyechijne nwakopshini, tye psolchijneko pokamlatachrino.”

⁶Wane chininitka, chiji rutskagata.
Rugakapatlu gitskagaya.
Maygaletuygale sagajpatlu kajpa.
⁷Wane chinru, "Gajewa. Kawjetikwaka
Silowega perkapinwa." Silowe walena
yokaakaluru, Yokanatkaluru. Giyagni
wane ya. Rerkinawa. Getachri ginatka.

⁸Giyagni wa rumwastsitanune, ga wa
muchikawa retanatjene wa maygaletu
rixaнатини, wane chinna, "¿Gi ge
walekni wa tye, wa tuplajenatachri
gagijenatachri?"

⁹Pimrine wane china, "Walekni."
Ga wa pimrine wane china, "Gike,
seyni wale pixka rixa."

Waleko wane china, "Gitakni."
¹⁰Giyagni wane chinruna, "¿Gi
pixpoko gimrekgalaetatk?"

¹¹Rugita wale. Wane china, "Wa jeji
Geso giwakatletachri, kamrujpatlu
kajpa. Sagayaletno. Wane chinno,
'Gajewa. Silowega perkapinwa.' Wane
nya. Nerkina. Netatka."

¹²Wane chinruna, "¿Ginaklu Wale?"
Wale wane china, "Goo. Gi numata."

Gwariseyone gepomgalu maygaletunaru

¹³Gwariseyone yegi ranikluna
maygaletunaru.

¹⁴Gapnanutikalurgognenwa Geso
kamrujpatlu kajpa, rumrekgakatkalu.

¹⁵Giyagni rumepe gepomgaletnakluna
Gwariseyone gi rixpoko getletatka. Wale
wane chinna, "Kajpa sagayaletno.
Nerkina. Netatka."

¹⁶Giyagni pimrine Gwariseyone wane
china, "Tye jeji gi wa Goyakalu yegi
giyakatyachri, gi rixanu gi wa
gapnanutikalurgogne rapnanuta."

Pimrine wane china, "¿Gi rixpoko
gimkata kamruretlu tyekaka
getkalurkaka satu jeji kmukochireru?"

Wannakakluko kotspalanshini-
kankakna. ¹⁷Giyagni rumepe wane
chinretatnakluna maygaletu, "Ga wa

pixa, ¿gi pchina pixa Waleya, gi rixanu
rumrekgakakyi?"

Wale wane china, "Tokanchi
geneklewatachrini."

Gwariseyone gepomgalu maygaletunaru giru

¹⁸Giyagni gi ralixpiranyegitluna
Goteyone wa maygaletu rixanatinri, ga
wa retinritka. Gi ralixluna
tomginpotunanukna rurune
rugletayaletikolutka. ¹⁹Repomgakna.
Wane chinkana, "¿Tyenwa gituru, wa
gixa wane chinanru maygaletu
gishpakyachri? ¿Ga gi rixpoko
getletatka?"

²⁰Giyagni rugitna rurune. Wane
chinna, "Wumatlu tyenwa wixa wgene
wa maygaletu gishpakyachri. ²¹Gikta
rixpoko getletatka gi wumata. Katukta
gimrekgakaklu gi wumata. Gepomganru
wale. Tsutkani wale. Walenanuko
ginkakletinwa."

²²Wane chinna rurune gi rixanu
Goteyone pikanna. Gi rixanu Goteyone
yijnaakatkana wa satu gippujtatinri
wa Mesiya rixinri, ruknooko maleka
ginkaklewawakapiya. ²³Giyagni rurune
wane china, "Tsutkani. Gepomganru
wale."

Satupje numata

²⁴Giyagni rumepe tomgaletatnakluna
wa jeji maygaletunaru. Wane chinruna,
"Pumalwutanru Goyakalu. Wixa gimatl
tye jeji kmukochirerni."

²⁵Giyagni wale gigita. Wane china,
"Kmukochireru rixinri, gi numata.
Satupje numata, wa maygaletu
nixanatinri, xawakni netatka."

²⁶Giyagni rumepe wane
chinretatnakluna, "¿Gi rixpokoty? ¿Gi
rixpoko gimrekgakakletyi?"

²⁷Rugitna, "Nunkakatagi. Gi wa
gjemno. ¿Klu chinanu galuka

yijnakletatnaklu? ¿Gixkoxlege galuklu wa yimaklengi gixinripa?”

²⁸Yangaluna. Wane chinruna, “Pixni wa yimakleryi, ga wa wixa Moysisi yimaklenwu wixa. ²⁹Wixa gimata wa Moysisi ruynumsata Goyakalu. Ga wa Tye, gi wumata ginaka runya.”

³⁰Rugita wa jeji. Wane chinna, “Galikakni giglajruni wa gixa gi gimatlu ginakakta runya, ga wa rumrekgakakno. ³¹Wumata wa Goyakalu gi yijnakotna kmukochirerune, seyni wa satu Goyakalu yonogyegitachri, ga wa Wale gishinikanru kamrutachri, wale yijnakota. ³²Gi pagogneko jempiranyegitka wa satu gimirrekgakakyawakatkalu wa maygaletu gishpakyachri. ³³Goyakalu yegi ma muyakatkanumka wa Tye gikemka rumkata kamruretanu.”

³⁴Rugitluna. Wane chinruna, “Psolpotuyako mukochri gimushpakachriyi, ¿ga wa pixa ginkaklewyegitwu wixa?”

Maleka ruknokluna.

Maygalene

³⁵Yijnakota Geso wa maleka ruknokyawakluna. Rukshiklu. Wane chinru, “¿Palixluge wa Goyakalu Wgene?”

³⁶Rugita wale. Wane china, “¿Katni Wale, Gitsrukaachi, wa nalixyaplu Wale?”

³⁷Wane chinru Geso, “Petatkalu. Walekni giynumsatyi.”

³⁸Wale wane china, “Nalixa, Gitsrukaachi.” Yoptsojityegitlu.

³⁹Wane china Geso, “Giklukanuwbynayegjixlewlu chinanu, Gita gina tye psolchijneko, retinripna metkane, ga wa maygalene rixinripna getachine.”

⁴⁰Wa pimrine Gwariseyone Wale yegi gwanatachine yijnakotlu Wale. Wane chinruna, “¿Wixkoxlege maygalenwu?”

⁴¹Wane chinna Geso, “Maygalengi gixkamka, gimka kmukochirepgi. Ga wa xani gi rixanu gixa wane china, ‘Weta,’ giyagni gmukochire waneygi.

Geso ginkakle: Yapkaklu gowegane prijerepiranaya

10 ¹“Galikakni, galikakni, wane nchingi, wa gowegane prijere gipgyaptotpotuko mijglokikatu, seyni pnusretako ratskomtya, walena kachowguru. ²Wa gipgyaptotpotuko jiglokyachri, Walenwa gowegane girukotachri. ³Wale chinanu kotpukgipgyaptoteta wa gipgyapto gajeru. Gowegane yijnaktokanutlu. Rowegatene tomga satkaka tgiwakaya. Koshpakna. ⁴Wa pejnuruneko Walenune koshpakininitkana, kosekamtatkana. Gowegane gomkagithu gi rixanu rumatatakantluna. ⁵Gi wa romkagitanruna pu gajeru, seyni rasukinrina wale, gi rixanu gowegane gi gimatatakantuna maleka gajene.”

⁶Tye yapkaklu tokanchi Geso ginkakna, seyni wanna gi gimata jemu klunwa wane chinyana.

Gesni wa kigleru kgirukotaprakleru

⁷Giyagni Geso gimepe wane chinretatnaka, “Galikakni, galikakni wane nchingi, Gitni wa gowegane gipgyaptotno.

⁸Pejnuruneko muchinanu ginachine Gitaya kachowgurunni, seyni wa gowegane gi yijnakotna. ⁹Gitni wa gipgyaptono. Gitaya jiglokyachri rognetaako. Jiglokjetanu. Rushpakjetanu. Rukshikjetanru nikyawakapa. ¹⁰Wa kachowguru gina walepje chinanu, chowguatinripa, ga wa ruylalewatinripa, ga wa nikatlewatinripa. Gita gina waneyna rixinripna ruwekinrina, ga wa ponikowa giwekletinripna.

¹¹“Gitni wa kigleru kgirukotaprakleru. Kigleru

girukotapratachri ruwekinri rutaka gowegane chinanu.¹²Wa wenutkalurni, wa girukotapratachri migje, kgowegateru migje, retapinri kewetna ginachri, ruknokamtma gowegane. Rasukatka. Kewetna kashichanna. Rakapalatna gowegane.¹³Wa wenutkaluru gasuka gi rixanu wa wenutkalurni. Gike rixluna wa wale wa gowegane.

¹⁴“Gitni wa kigleru kgirukotapraklerno. Numatna nowegatene. Wa Gitanune gimatno. ¹⁵Waneko pixka rixa gimatletno Gita Girchi, ga wa Gita gimatlu Girchi. Nutaklu nuwekinri gowegane chinanu. ¹⁶Pimrone koxa waneyno gowegane, tye prijere mwakane. Wanna koxa numkata gwapleta. Yijnaktokanutannona. Waneplu satupje rapatyawakapna gowegane, ga wa satupje girukotapratachri. ¹⁷Giyagni Girchi gishinikno gi rixanu nuwekinri nutaka numepe yoptoletyapatnaklu. ¹⁸Gike konanno nuwekinri, seyni Gitako gitaklu Gitanuko. Nutaaka nutakyaplu. Nutaaka numepe yoptoletyapatnaklu. Wane rixa yokanretno Nuru.”

Kotspalanshiniinkankaku Goteyonkakluko

¹⁹Wanetnaklu kotspalanshiniinkankaku Goteyonkakluko tye tokanchi chinanu. ²⁰Gixolune wane china, “Kamchi waneylu. Seprolokachrini. ¿Klu chinanu gyijnakotlu?”

²¹Pimrine wane china, “Gi wa kamchichachri tokanni wa tye. ¿Kamchirge gimkata gimrekgakakletlu satu maygaletu?”

Nowegatene jematokanutno

²²Gerosale waneru meyiwlugogne, wa kpashiwakapji gitaaokklungogne. Ginapukluni. ²³Kpashiwakapji yotaljeta Geso, gitamnu Salomonu. ²⁴Giyagni

sajruklu Goteyon. Wane chinruna, “¿Giklununu pali kojwakanshinikanretanwu? Wa Kristo pixinipa, punkakanwu pgujetanwaka.”

²⁵Rugitna Geso, “Nunkakkakagi. Gi galixa. Wa nkamrurkaka Nuru giwakaya, waleko gipgujtatto Gita. ²⁶Seyni gixa gi galixa gi rixanu gi wa nowegatengi.

²⁷Nowegatene jematokanutno. Gita gimatna. Romkagittona. ²⁸Gita genekna ruwekinrina gike rixiniko mnikawnakatu. Gi pagogneko ramganna. Gikena koshripatanna nomoyoya. ²⁹Nuru, nenekjeru, pejnurune pnute tsruni Wale. Gikena gimkata koshripletna Nurumyoya. ³⁰Gita ga wa Girchi satupjerunwu.”

Goteyon galuka sotlujeretlu Geso

³¹Rumepe koscheksotleretna Goteyon sotlujetyapluna. ³²Rugitna Geso, “Gixo kigleru kamrurchi nekakgitgi Girchiya. ¿Giru kamrurchi tyekaka chinanu nsotlujetanmakno?”

³³Rugitluna Goteyon, “Wa kigleru kamrurchi chinanu, gi wa wsotlujetyi, seyni wa mupashiregnuchi chinanu wsotlujetanmakyi, gi rixanu Pixa yinerukyi Goyakalu putaknawa.”

³⁴Rugitna Geso, “¿Gi ge yonatka wa Tokanchi Yukanatkalaruya gixanu: **Gita wane china, goyakalungi?**

³⁵“Wane chininna goyakalune wanna Goyakalu tokanu genekikolune, ga wa yonchi gi rumkata kaspukletko, ³⁶wa Gita Girchi kpashiri gitakanruno, tyechijne yokanatanru, gixa wane china, ‘Mupashiregnuchi pchina,’ gi rixanu wane nchina, ‘Gitni Goyakalu Wgenno.’

³⁷Gimka Nuru kamrure nkamrutanu, gi galixanno. ³⁸Wa nkamrutinri, gimka galixanno Gita, galixanru kamruchi, gimatypatkalu, gimatgognenatinripa wa Girchi gwano Gita, ga wa Gita Girchi nwa.”

³⁹Giyagni rumepe galuka kashretmakluna, ga wa Wale gishpakamta wannayegiya.

Rumepe Gorta wakanute yaletatnaka Geso

⁴⁰Rumepe Gorta wakanute yaletatnaka, wa Gwa muchinanu katlewjenatyawaka. Wane rawanata.

⁴¹Gixo yayegitlu. Wane chinna, “Gwa galikakni gi satuko getkaluru kamruta. Seyni Gwa ginkakletjenatanru wa Tye ptowruko galikakni.” ⁴²Gixo galixlu waneya.

Lasaro yayixinri

11 ¹Yayixana Lasarni, Wetani gjerni, Mariya gwiyawaka pokchi, ga wa tyegwaklo Marta. ²Mariya, wa Gitsrukaachi pgamlugalo gyokachro, ga wa tsheyjixitlu tojiwutsaya ga ga walanza yayixyegwakatachro Lasarni. ³Repurone yokanrewata Wale yegi. Wane chinjixluna, “Gitsrukaachi, petanu, wa palukanruni yayixanatka.”

⁴Wa yijnakotinitka Geso wane china, “Tye yayixlu, gi wa gipukchipni seyni rumalwutikolupa Goyakalu, wa Goyakalu Wgene gimalwutikolupa Wale chinanuya.”

Lasaro gipnale

⁵Geso gishinikna Marta, ga wa tepuro, ga wa Lasaro. ⁶Giyagni wa jeminitka wa yayixinrinatka, wane rutukawa gepgogne wa rawanatyawaka.

⁷Giyagni wanepnute wane chinna yimaklene, “Gote gayanutnaka.”

⁸Yimaklene wane chinru, “Rawi, tyegognekakniko, raluka soltujeretanyina Goteyone. ¿Waneklege pyanutnaka?”

⁹Rugita Geso, “Waneylu pagogne pamole gepi gora. Gogi yanini satu, gi

wa rutspeta, gi rixanu tyechijne pokamlatchini reta. ¹⁰Wa satu goyecho techno yanini rutspeta, gi rixanu maleshu pokamlalu waleya.”

¹¹Rali wane chinretinitka, wane chinna, “Lasarni, walukanru, rapnanutatka. Seyni wane nyanyu. Nkomyekapanru.”

¹²Giyagni wane chinruna yimaklene, “Gitsrukaachi, rapnanutini, rutukanu.”

¹³Wa Geso wane chinre wale gipnaleya. Wa wanna kagwaklu wa rapnanushatinri rumkinriyapirana, china.

¹⁴Giyagni Geso wane chinatkana pgujetanwaka, “Lasarni gipnanatka.

¹⁵Numuwata gixa chinanu, gi wa wane nwanata, galixinripa. Seyni gayanutka wale yegi.”

¹⁶Giyagni Tomasu wa Gepirutu chinkaluru wane chinna ruyimakikolune, “Wane koxa gayanu wixa Waleyma wupniripa.”

Yotunru ga wa giweklu

¹⁷Giyagni rapokinitka Geso, rumatattaku gepkoxamkojgognetkani kapnatikolutka. ¹⁸Wa Wetani gi gowukayatkalu Gerosale, mapa getko kilometroni. ¹⁹Gixo Goteyone ginyegitlo Marta ga wa Mariya yegwakluniyna rumnankapkana. ²⁰Giyagni Marta jeminitka Geso gininritka, tyoptopatu. Ga wa Mariya panchi tuplanata.

²¹Giyagni Marta wane chinru Geso, “Gitsrukaachi, gewi pwanatkamka, gimka rupnanni nyegwakluni. ²²Xani koxa numatlu wa pejnuruko pagityaplu Goyakalu, Goyakalu genekanyi.”

²³Wane chinro Geso, “Yotunotanu pyegwaklupa.”

²⁴Marta wane chinru, “Numatlu yotunotinripa yotunkoklunchipa ralipregogonape.”

²⁵Wane chinro Geso, “Gitni wa yotunru ga wa giweklu. Wa nalixjeru

rupnanmaka, ruwekanu. ²⁶Pejnuruneko giwekachine nalixjene gi pagogneko rupnanna. ¿Gi ge palixlu tye?”

²⁷Wane chinru, “Gigi, Gitsrukaachi. Nalixatka gita Pixni wa Kristoyi, Goyakalu Wgenyi, tyechijne ginachriyi.”

Geso chiyagata

²⁸Tali wane chinretinitka, talimta. Pochkeroko tomgalo tepuro Mariya. Wane chinru, “Gewitkalu Yimaklewatachri. Repukyi.”

²⁹Wala jeminitka, giyampotu tpalnamta. Tyayegitlu. ³⁰Gi wa pokchi rapokawa Geso, seyni wa Marta yoptotapyawakaku rawanata. ³¹Giyagni Goteyone panchi gwanatachine walayma tumnanukanatjene, wa retinitkalona Mariya tunwamtinritka giyampotu, tushpakanatka, romkagimtlona. Kagwakna wa yomlechi tyinripa wane chiyamtapinripa.

³²Giyagni Mariya tapyegitinitkalu Geso, tetinri, chiji tapokamta gjixistsi. Wane chinru, “Gitsrukaachi, gewi pwanatkamka, gimka rupnanni nyegwakluni.”

³³Giyagni Geso wa retinro chiyagatachro, ga wa walayma ginachine Goteyone chiyaganatachine jigekeanuwata ginshinikanuya. Kojwakanshinikanuta.

³⁴Wane china, “¿Ginaka gitakanru?”

Wane chinruna, “Gitsrukaachi, punanu. Petapanru.”

³⁵Chiyagata Geso. ³⁶Giyagni wane chinna Goteyone, “¡Getanru! ¡Gi pagaluklenanukta rixlu!”

³⁷Wanna pimrine wane china, “¿Gi ge rumkatlu wa Tye wa maygaletu gimrekgakakachri, gituukakletlu wale ma mupninitipa?”

Lasaro yotunkaaka

³⁸Giyagni Geso jigekeanuwatnaka Walenanuko. Yomlechi yegi rapoka.

Gitawakapnani, sotlu gishyatkaluru.

³⁹Wane china Geso, “Gkoschekanru sotlu.”

Marta, wa gipnachri gepuro wane chinru, “Gitsrukaachi posunatkalu, gi rixanu gepkoxamkojgognetkani.”

⁴⁰Geso wane chinro, “¿Gi ge wane nchinyi, palixini petanru Goyakalu goyaknu?”

⁴¹Giyagni koschekluna wa sotlu wa gipnachri gitakikowakaya. Wa Geso teno yigata. Wane china, “Nuru, npoyagnutyi Pixa yijnakotyawakno.

⁴²Numata pyijnakjetno. Seyni gixolune yine chinanu wa sajrukachine, wane nchina, wa ralixinripna Pixa yokanatyano.”

⁴³Rali wane chinretinitka, saplewata. Tsru tokanu rixa, “Lasaroo, tekali. Pushpakanu.”

⁴⁴Wa gipnanatachri rushpakanatka, gostumyotkaluru, ga wa gjixi mkachrichrataya. Ga wa gigoji sapwakgojitka kasamalu.

Wane chinna Geso, “Gkaspukanru. Getasha yaletanru.”

Jemanshinikankakna ruylatyapluna Geso

⁴⁵Giyagni gixo Goteyone wa Mariya yegi ginachine, ga wa Geso kamrutanru getachine ralixluna Wale. ⁴⁶Wa wanna pimrine Gwariseyone yegi ya. Runkaakana wa Geso

kamrutanrupirana. ⁴⁷Giyagni wa tsrukakalune sasertotene ga wa

Gwariseyone gapatjetna

jemanshinikankakjetikwaka gajene.

Wane chinna, “¿Gi wixanutka? Gi

rixanu wa tye jeji kamrulku gixo

getkalurkaka. ⁴⁸Wetasha wane gixletinri

pejnuruneko galixanru. Runanna

Romanone. Konanunwuna gawiywaka

ga wa wgirukotlewatyawaka.”

⁴⁹Wa Kaygwasu, satu wannate, wale walapu sasertotene gitsrukate potu

rixinri, wane chinna, "Gixa gike gimata.⁵⁰ Gi waleko gyanshinikanuta wa rupxakyapwu wa satu jeji gipniripa yine chinanu, ma mamginitipna pejnuruneko yine."⁵¹ Gi wa waleko rushinikanu wane china, seyni wa sasertotene gitsrukate potu rixinri wale walapu, tokanchi reneklewata. Wane china wa Geso gipniripatka yine chinanu.⁵² Gi wa wannanerupje chinanu, seyni koxa wanerutupje rapatyawakapna Goyakalu wgenene wa gipalanatachaine.⁵³ Giyagni walgogneyakawa jemanshinikankakna ruylatyapluna.

⁵⁴ Giyagni Geso gi wane yapatka pgujetanwaka Goteyonetskalaya, seyni wane yiyatka. Yineru mwiyawakanusti gwachijnetachri ya, satu pokchi Giprayi giwakatletachri. Wane rawanata yimakleneyma.

Yokanatkaluru kashichikolupa

⁵⁵ Wa Tsru Giknoglushgogne Goteyonenu gi gowukatkalu. Walesreta rushpakyana gixo. Gerosale kanikna, Tsru Giknoglushgogne ma mapookanuwa, kpashirine rutakikolpna.⁵⁶ Giyagni rujgaluna Geso. Kpashiwakapjiya tunwatachine wane chinkakna, "¿Gi pixka getle gixlu? ¿Gi wa meiyatikwaka runanu?"⁵⁷ Tsrukakalune sasertotene ga wa Gwariseyone yokanrewatna, wa katukokta gimata ginaka rawa, runkaklewatinripa wa kashichyapluna.

Ruyokjixitka Geso Wetaniya

12 ¹ Giyagni patsrujirgogne magatiniwa Tsru Giknoglushgogne, Wetani rapoka Geso, wa Lasaro gwiywaka, wa gipnapachri wa yotunkakanru gipnachineteskalya.
² Giyagni wane ralpkotyaluna nachnewlupa. Marta gitspaprota. Lasaro

walenwa ruxiplatjeru nikikowakaya.
³ Giyagni Mariya wa pgamlugalo ganikaji ginnu twapa, nartogapje kwenuru potu. Tuyokjixitlu Geso. Tsheyjxitlu tojiwutsaya. Psolupjiko tyapa pogamlunuta.

⁴ Satu yimakleru Gota Giskaryote, Simo wgene, wa samyokjerupa, wane china,⁵ "Klu chinanu gi tushankaka twu pgamlugalo wa mapa pachaproji chinanu, kwamonurunnimka teneeko?"⁶ Gi wa retwamonutya chinanna wa kwamonurune, seyni gi rixanu kachowgurni wale. Sroschimapra ranika. Rawjetlu tsapatkaluru.

⁷ Giyagni Geso wane china, "Petashatanro. Nkapnatikolgogne chinanu tumretlo wa twu.⁸ Gi rixanu wa kwamonurune gimwagognenata gixa, ga wa Gita gi wa gimwagognenatanu."

Jemanshinikankakyegitluna Lasaro

⁹ Giyagni gixolune Goteyone gimata wa wane rawinri Wale. Gi wa Geso chinanupje runna, seyni Lasaro koxa retapinripna wa yotunkakanru gipnachineteskalya.¹⁰ Jemanshinikankakna tsrukakalune sasertotene, Lasaro koxa ruylatinripna.¹¹ Gi rixanu wale chinanu gixo Goteyone wane ya. Ralixluna Geso.

Gerosale rapokinri gakaglokewatachri

¹² Waleprirkogogne gixolune yine gina meiyilu yegi, gi rixanu yijnakotluna Geso Gerosale yinripa.¹³ Rawluna kasureru. Yoptotapluna. Saplewatna:

iPoyagnu!

iGiglenshinikanyegitkaluru

Gitsrukaachi giwaka ginyachri,
Gisrayiline Pogire!

¹⁴ Geso gikshiklu mporo. Waletji tuplata. Yonchi chinyawaka:

¹⁵ Gi pikana, Siyo nshicho.

Petanru. Pogire gina,
mporo wgenetji tuplatachri.

¹⁶Muchinanu yimaklene gi gimata
jemlu tyekakapirana, seyni royaknu
jiglokinitka Geso, waneklu rushinkapluna
tyekaka yonatkaluru Walepirana, ga wa
wane rixluna tyekaka.

¹⁷Giyagni wa gixolune Wale yegi
gwanatachine, wanna gipgujtatl
tomgiyawaklu Lasaro kapnaya.
Gipnachinetskalaya yotunkaklu. ¹⁸Wale
koxa chinanu yoottapluna gixolune
yine, gi rixanu jempiranyegitluna Wale
getkaluru kamrutinri. ¹⁹Giyagni
Gwariseyone wannakakluko wane
chinkaka, “Getlu. Gikekapi gkamruta.
Getanru. Psolchijne gajeneko
gwagajxigilu.”

“Waluka getletlu Geso”

²⁰Kanikachine meyiwl
yoptsojityentapachinepaymana pimrine
Kriykone. ²¹Giyagni wa nyi gapyegetlu
Wilipi, Wetsayta, Kalilesreta
gajerunamu. Ragjtluna. Wane chinruna,
“Wumole, waluka getletlu Geso.”

²²Wilipi ginkakaplu Gantirishi.
Gantirishi ga wa Wilipi ginkaklu Geso.
²³Geso gigitna. Wane china, “Nopapko
gapokanu noyaknu njiglokiripa Gita,
Yineru Wgenno. ²⁴Galikakni, galikakni
wane nchingi, Chiji ma mujrukini trikoji,
ma mupnakanu, walepje gituka. Wa
rupninina, gixoji rawini. ²⁵Ruwekinri
galukachri, ramginina ruwekinri, ga wa
ruwekinri gayegixachri tyechijneya, wale
gimretanru ruwekinripa gike rixiniko
mnikawnakatupa. ²⁶Satu
kamrurewyegitinno, romkagittanno.
Ginapkaktano, wane koxa rawanu
nkamrurewyegitjeru. Satu
kamrurewyegitinno, Nuru gitakanru
kagwakpiratikolupa.

Yineru Wgene gimkata yotunkakletkota

²⁷“Xani nkoywakanshinikanuta. ¿Gi
nchinanu? ¿Nuru, pognetkakanno

tyepapkoya? Seyni tye chinanukni
tyepapko nuna. ²⁸Nuru, pgiwaka
gimalwutikolupa Pixa chinanu.”

Giyagni tengogne ruyakaty tokanchi,
“Rumalwutikolutka Gita chinanu.
Rumepe gimalwutikolupa Gita
chinanupu.”

²⁹Giyagni wa gixolune wane
gwanatachine, yijnakonatachine, wane
chinna, “Rutlogleni.”

Pimrine wane china,
“Goyakalutowreru giynumsatlu.”

³⁰Rugita Geso. Wane china, “Gi wa
Gita chinanni runa tye tokanchi, seyni
gixa chinanu. ³¹Xani
ruklukanuwnayegixikolna tye
psolchijne gajeneko. Xani tye psolchijne
gajeneko gitsrukate, Satanasyo,
giknookalurupni maleka. ³²Wa
yotukinpatkanona chijiya, pejnuruneko
nkosetanu Gita yegi.” ³³Wane china
rumatkakyapna gi pixkalutu gipukchi
rupniinripa.

³⁴Giyagni rugitluna gixolune, “Wixa
jemlu Tokanchi Yukanatkaluruya wa
Kristo gwagognenatanu. ¿Gi pchinkoxge
Pixa: ‘Rumkata yotunkaakota Yineru
Wgene?’ ¿Gi gixachringe wa tye Yineru
Wgene?”

³⁵Giyagni Geso wane chinna,
“Pshinitsonu gixa yegi rawanu
pokamlalu. Pokamlalu waneyakopshingi
gyananu, ma kashichkanupgi wa
mapshagal. Wa mapshagwaka
yanachri gi wa rumata ginakakta ya.

Gotefone malixle

³⁶“Pokamlalu waneyakopshingi
galixanru pokamlalu, wa pokamlalu
wgenene gixinripa.” Walekakapirana
yanumsata Geso. Ralimta. Yogimatyana.

³⁷Gixomka getkaluru kamrugetanutna.
Gi ralixluna Wale, ³⁸poyagkakikolupa
wa tokanchi Gisayiya tokanchi
geneklewatachri chinyawaka:

**Gitsrukaachi, ḋatu galixlu
wunkakletanru?**

៥Katu gekakgitka wa
Gitsrukaachimyo?

³⁹Wale chinanu gi rumkata galixletna,
gi rixanu rumepe wane chinretatnaka
Gisayiya:

⁴⁰ Maygalene rixkakna.

Shikowgajaknakna.

Giygaleyna ma metinitipna.

Ma mumata jemgajitinipna ma
kashrjetikotupna.

Nma mutskalakyuanupna.

⁴¹Tyekaka chinjeta Gisayiya wa retinri
wa royaknu, Walepirana ruynumsatinri.

⁴²Wane gixkamka, seyni wa
tsrukakaluneko gixo galixlu Wale, seyni
wa Gwariseyone chinanu gi wa
rupgujatluna, ginkaklewakapji ma
muknokikotupna. ⁴³Gi rixanu
ralukpotutluna yine gimalwure
Goyakalu gimalwure pnu.

Geso tokanu giklukanuwnakaklewatinri

⁴⁴Saplewata Geso. Wane china,
“Nalixjeru gi Gita ralixa seyni wa
nyokanatjeru galikaka. ⁴⁵Wa netjeru
retkoxlu wa nyokanatjeru. ⁴⁶Gitni
pokamlalno tye chiji ginachrino wa
pejnuruneko nalixjene mapshagwaka
mawinitipna.

⁴⁷“Satu jeminri ntokanu, gi wa
ralixanru, gi wa Gita
giklukanuwnayegijianru. Gi rixanu gi wa
nuna nuklukanuwnayegijixypna tyechijne
gajene, seyni nognetkakyapna tyechijne
gajene. ⁴⁸Nuknokjeru, gi wa
yoptotokanutno, waneru wa
rukluwanuwnayegijixerupa. Wa tokanchi
nunkakletanru, wale
giklukanuwnakakanru ralipregognepa.
⁴⁹Gi rixanu gi wa Gitako nushinikanu
nunkaklewata, seyni wa nyokanatjeru
Girchi, Wale yokanatno wane
nchinyawakapa, ga wa nunkakletanrupa.

⁵⁰Numatlu Wale yokanatyawaka Walenwa
giweklu gike rixiniko mnikawnakatu.
Giyagni wa Gita ginkakletanru wa Girchi
chinyawakno, wane nchina ginkakleta.”

Geso gerkjixitna yimaklene

13

¹Ma mapookanuwa meyiwl
Tsrū Giknoglushgogne, rumata

Geso wa gipapko gapokinritka,
tyechijne rushpakinripatka, Girchi yegi
yinripatka. Wane rixa gishinikletna
Walenune tyechijne gwanatachine,
yoptukyawakpotuko rushinikna.

²Rali nachinewletinitkana kamchi
gajitletkakatkalu Gota, wa Simo Giskaryote
wgene, samyokyapatkalu. ³Rumata Geso
wa Girchi genekyalu pejnurkakako, ga wa
Goyakalu yegi giyakatyachri, ga wa
Goyakalu yegi ya. ⁴Palnatka
nachnewluyegiya. Komkaga. Sheyipisama
rawa. Saprikapchijitnawa. ⁵Wanepnute
gerkapi rutakgatlu gonu. Yinuwaka
gerkjixletra yimaklene. Sheyipisama
saprikapchijitanruya sheityana.

⁶Giyagni Simo Petro yegi runini, Petro
wane chinru, “Gitsrukaachi, ḋPixlege
gerkjixitanno?”

⁷Rugita Geso. Wane chinru, “Wa Gita
kamrutanru, gi wa xani pumata jemu.
Wa gowukshinuya pumata jemanru.”

⁸Wane chinru Petro, “Gike pixiniko
perkjixitanno.”

Geso gigitlu, “Nma merkakanyi
maleshayapyi Gitanuya.”

⁹Wane chinru Simo Petro,
“Gitsrukaachi, gi wa nojixipje, seyni
nomyo koxa ga wa nojiwu koxa.”

¹⁰Wane chinru Geso, “Wa
gerkakalurutka, gi wa magatatka.
Satupjetkalu wa gjixipje gerkako, seyni
psoluyako powratka. Ga wa gixa
powralungi, seyni gi wa pejnurunekgi.”

¹¹Gi rixanu rumatlu samyokjerupa.
Giyagni wane china, “Gi wa
pejnurunekgi powra.”

Gyimanrupa nekakgitgi

¹²Giyagni rali gerkajixitletitikana, wa rawamkatinika, tuplatatnaka nikikowakaya. Wane chinna, “¹³Gi ge gimathu wa nixyawakgi? ¹³Gixa wane chinjetno, ‘Yimaklewatachri ga wa Gitsrukaachi.’ Wanepotuko nchina, gi rixanu Gitakni. ¹⁴Maka Gita wa Gitsrukaachino ga wa Yimaklewatachrimo nerka jixitgi, gixa koxa gimkata gerka jixkakleta. ¹⁵Gi rixanu gyimanrupa nekakgitgi, gixa koxa kamrutyaplu nkamrutyagi. ¹⁶Galikakni, galikakni wane nchingi, wa wayegrechri gi wa rutsrukate pnu te tsruni wale. Wa yokanatkaluru gi wa yokanatjeru pnu te tsruni wale. ¹⁷Tyekaka gimatini, giglenshnikanyegitkalunepgi wa wane gixinipa.

¹⁸“Gi wa pejnurunekgi gixapirana wane nchina. Gita gimatna ginnanwa ntsomitamune, seyni poyagkaakalurupa satu tokanchi yonatkaluru, wane chinachri: **Wa Gitayma Jimapro Nikachri rumtukno yokwireya.**

¹⁹“Xanigognenanu nunkakgi ma mapookanuwa, wa rapokinipa galixanno Gita nixinri. ²⁰Galikakni, galikakni wane nchingi, wa nyokanatanru yoptotachri Gita yoptota. Ga wa Gita yoptotachri nyokanatjeru yoptota.”

Geso ginkakletlu wa satu yimaklerni wa samyokjerupa

²¹Wane chininitka Geso, kojwakanshinikanuta. Rupgutalewata. Wane china, “Galikakni, galikakni wane nchingi, satu gixa nchininri wale samyokanno.”

²²Giyagni yimaklene getjekaka. Gi rumatanshinikanutna katupiranni wane china. ²³Waneru satu yimakleru Geso gishinikanru, Geso gitspanostatachri.

²⁴Giyagni Simo Petro gitnoyegitlu tye, wa repomgiyaplu katupiranni wane china. ²⁵Geso gitspanostatachri wane chinru, “Gitsrukaachi, *čkatni wale?*”

²⁶Giyagni rugita Geso, “Waleni Gita genekanrupa psoji gigakachri.” Wale gigaklu psoji. Reneklu Gota Giskaryote, wa Simo wgene. ²⁷Psoji niklokinitka, Satanasyo jiglokatkalu.

Giyagni Geso wane chinru, “Pcamrutanru giyampotu pkamrutanru.”

²⁸Gi satuna nikikowakaya tuplanatachine gimata klu chinanu wane chinru. ²⁹Gi rixanu pimrine kagwaklu wa Gota ktsapane rixinri, Geso wane chinru, “Pagjitanru wa walukanru meyiwlw chinanu, waka kwamonurune renekanu pagixanu.” ³⁰Giyagni wale yoptotinitkalu psoji, waneklu rushpakamtatka. Goyechnotkani.

Gerotu yokanru

³¹Giyagni rushpakamtinitka, wane china Geso, “Xanitkani njiglokanutka noyaknu Gita Yineru Wgenno. Ga wa Goyakalu gimalwutikolpatka Gita chinanu. ³²Goyakalu gimalwutikolupu Gita chinanu, Goyakalu chinanu koxa Gita gimalwutikolupu. Xaniyakawa numalwutikolupu Goyakalu chinanu.

³³“Wiwine, pshinitsonu numwanutkagi. Gijganmakno. Wa Goteyone nchinyawaka, wa nyiyawakapa Gita, gixa gi gimkata wane yaletanu. Wane koxa nchingi gixa xani.

³⁴“Satu yokanru gerotu nenekgi, wa gishiniikakinripa. Gita gishinikinikopixkagi, waneko pixka gixa gishiniikakletanu. ³⁵Wale chinanu pejnuruneko gimatatu gixni wa nyimakleni, wa gixkakluko gishiniikakinripa.”

**Geso ginkakletagnaputlu
Petro nutatinripa**

³⁶Simo Petro wane chinru, “Gitsrukaachi, ḡinaka pyanu?”
Geso gigitlu, “Wa nyiyawakapa Gita gi pumkata gomkagletanno wa xani. Wa gowukshini pomkagitanno.”

³⁷Petro wane chinru, “Gitsrukaachi, ḡku chinanu gi numkata gomkagletanyi wa xani? Pixa chinanu nutakanru nuwekinri.”

³⁸Geso gigitlu, “Gita chinanu putakanru puwekinri? Galikaknī, galikaknī, wane nchinyi, ma yanumatkanuwa gaxawripa, mapa kata pnutatanno.

Gatnugapo, ga wa tokanchi galikakpotu, ga wa giweklu

14 ¹“Gi gkojwakanshinkangajitinwa. Galixlu Goyakalu. Galixankoxno Gita. ²Nurupji gixo gwikwaka wane. Wane ma mixkanumka, nunkakanmakgi. Giyagni nyanuchi. Nalpoktapingi gwiyawakapa gixanupa. ³Nyinpatka, nalpokotiniplu gwikowakapa gixanupa, nunanutnaka. Gitako gwapanutkagi. Nwiyawaka koxa Gita, wane koxa gwanu gixa. ⁴Gimatlu ginaka nyanu. Gimatgapotlu.”

⁵Tomasu wane chinru, “Gitsrukaachi, gi wumata ginaka pyanu. ḡi wiwpoko gimatletanru wa gatnugapo?”

⁶Geso wane chinru, “Gitni wa gatnugapo, ga wa tokanchi galikakpotu, ga wa giweklu. Gike yayegitlu Girchi, seyni Gitapje chinanu yayegitka Girchi. ⁷Gimatinno, Nuru koxa gimatanu. Xaniyakawa gimatl. Getatkalu.”

Pekakgitanwu wa Girchi

⁸Wilpi wane chinru, “Gitsrukaachi, pekakgitanwu wa Girchi. Poyagota wixa chinanu.”

⁹Geso wane chinru, “Gi pomshiniko numwatkagi, ḡi ge pumatno, Wilipi? Wa netjeru retkoxlu Girchi. ḡi pchinkoxge pixa, ‘Pekakgitanwu Girchi?’ ¹⁰Gi ge palixno wa Gita Girchi nwinri, ga wa Girchi Gita rawa? Wa tokanchi nunkakyagi, gi wa Gitako nonshinikanu wane nchina. Seyni wa Girchi Gita gwachri Wale kamrutlu wa kamrurchikaka. ¹¹Galixanno Girchi nwinri, ga wa Girchi Gita rawa. Gma wane gixkanupa, galixanno kamruchiayako.

Kamrurchi tyekaka pnuṭe

¹²“Galikaknī, galikaknī wane nchingi, wa kamrurchikaka nkamrutanru nalixjeru koxa kamrutanru. Ga wa tyekaka pnuṭe kamrutanu nalixjeru, gi rixanu Girchi yegi nyanu.

¹³Klunerukokta gagjitanru Girchi ngiwakaya, wale nkamrutanu, Girchi gimalwutikolupa Gituru chinanu.

¹⁴Klunerukokta gagjitinipa ngiwakaya, Gita kamrutanru.

Giwekikaluru Kpashiri gipiratkaluru

¹⁵“Gishinikinipno gkamrutanru nyokanatanrukaka. ¹⁶Gita gagjitanru Girchi ga wa satu Kgimnanukakleru renekangi, gixa yegi gwagognenatachripa. ¹⁷Walenwa Giwekikaluru galikakpotununu. Wale tyechijne gajene gi gimkata yoptoletanru, gi rixanu gi retrluna. Gi koxa rumatluna. Gixa gimatl gi rixanu gixa yegi rawa, ga wa gixa gitokote rawanu.

Kristo gipgujewninri

¹⁸“Gi wa murungi nuknokamtanu. Nyayegitangi. ¹⁹Pshinitsonu tyechijne gajene gi getanutkano, ga wa gixa getanno, gi rixanu Gita giweka, ga wa gixa koxa giwekanu. ²⁰Walegogne

gimatanu wa Girchi nwinri, ga wa Gita gwa gixa, ga wa gixa nwa Gita.

²¹Nyokanrekaka waneyalutu, ga wa wale kamrutachri, walena nushinikjeru. Nushinikjeru Nuru gishinikanrupa. Gita gishinikanru. Nupgujetinwa wale yegi.”

²²Gota gi wa Giskaryotni wale, wane chinru, “Gitsrukaachi, Ɂklunerni wa tye wa wixa yegi pupgujetinwa, gi wa tye psolchijne gajeneko yegi?”

²³Geso gigitu. Wane chinru, “Girukokta gishinikinipno rumretatokanutanno. Nuru gishinikanru wale. Wale yegi gayanu. Wale yineru yegi gawgognenatanu. ²⁴Nma mushinikjetu gi gimretanru ntokanu. Ga wa tokanchi gyijnakotanru gi wa Gitanni, seyni Girchi wa nyokanatjeru tokanni.

Giglewanshinikanru nuknokyegimtgi.

²⁵Tyekaka nunkakgi gixa yegi nwanatini. ²⁶Wa Kgimnanukakleru, Giwekikaluru Kpashiri, wa Girchi yokanatanru Gita giwakaya, Wale gimatkakangi pejnurukopirana. Rushiniikakangi pejnurupiranako nunkakyagi. ²⁷Giglewanshinikanru nuknokyegimtgi. Nuglenunshinikanu nenekgi. Gi wa tyechijne gajene genekle pixka, Gita genekyagi. Gi wa gkojwakanshinikanutinwa. Gi wa kpklegolunepgi.

²⁸“Gyijnakotlu wa nunkakyawakgi: ‘Nyanu, ga wa nunanutnaka gixa yegi.’ Gishinikinipno, gimuwanutanmaka, gi rixanu wane nchina, Girchi yegi nyanu. Gi rixanu Girchinwa Gita pnute tsru.

²⁹Ga wa xani nunkakatkagi ma mapookanuwa, wa wane rixinpatka galixinripa. ³⁰Gi wa gixo potu nuynumsatanutkagi, gi rixanu runatka kamchi, tyechijne gitsrukate. Gike waneylu wa Gitaya. ³¹Seyni rumatinripna tyechijne gajene Girchi

nushinikinri, ga wa Girchi yokanatyawakno wane nixa kamrureta. “Ntunwatanu. Gewi gayinitka.

Geso ginkakna Gowatsa galikakpotupirana

15 ¹“Gitni wa gowatsno galikakpotu. Nurni wa kgisanateru. ²Pejnuruko giplutsa Gita gwachri, gi kajru, Wale konanru. Ga wa pejnuruko kajiru Wale powratanru jiwpotutinripatka. ³Ga wa gixa powralunetkagi tokanchi chinanu wa nunkakyagi. ⁴Gita gwanu gixa. Gixa nwantu Gita. Wa giplutsa pixka gi rumkata gwaleta walenanuko, wa gowatsa mwakatu rixini, waneko pixka gixa, Gita gmawakanu.

⁵“Gitni wa gowatsno. Gixni wa giplutsa. Gita gwachri, wa wale nwini Gita, wale gixoji gwiylu. Gi rixanu Gita mwakatu gike gimkata kamrureta gixa.

⁶Girkuta gi gwinno, maleka giknookalurupa wa giplutsa pixka. Rupriganu. Rawanruna. Xirnachri ruknokanruna, ga wa xirnanu. ⁷Gita gwini. Gixa rawini ntokanu, galukanru pejnunanuka gagjitanu. Waneyapgi. ⁸Waleya rumalwutika Nuru, wa gixa gixo Wale kamrure gwinri. Wane gixinipa nyimaklenepgi.

⁹“Girchi gishinikinikopixkano, wane nixa gishinikletgi. Nushiniklewle gomkagitanu. ¹⁰Gkamrutiniplu nyokanrekaka nushiniklewle gomkagita. Gita pixka Nuru yokanrekaka nkamruta ga wa rushiniklewle nomkagita.

¹¹Tyepirana nunkakgi, numuwle waneyapgi, ga wa gixa gimuwlle tseruwnapotutinripa.

Geso ginkakna wa gikena waneya rushiniklewle tye pnute tsru

¹²“Tyenwa nyokanre, wa gishiniikakinripa, Gita gishinikinikopixkagi. ¹³Gikena waneya

rushiniklewle tye pnuute tsru, wa rutakyaplu ruwekinri rumatanune chinanu.¹⁴ Gixni wa numatanungi wa gkamrutinri nyokanatyagi.¹⁵ Gi wa wayegrechine nchinanutkagi, gi rixanu wa wayegrechri gi rumata kluneru kamruta wa rutsrukate. Seyni numatanune nchinatkagi, gi rixanu ptowrukakpirana nyijnakotanru Nuru yegi, numatkakgi.¹⁶ Gi wa gixa tsomitno Gita, seyni Gita tsomitgi gixa. Nutakgi gyinripa, kiglerkaka gkamrutinripa, ga wa gkamrutanrupa gwagognenatinripa, wa klunerukokta gagjityaplu Girchi ngiwakaya Wale genekangi.¹⁷ Tyenwa nyokanyegitgi, gishiniikakinripa.

Geso galipre ginkaklewleta

¹⁸“Tyechijne gajene gayegixinipgi, imatanru Gita gapka rayegixna ma mayegixkanuwagina gixa.¹⁹ Tyechijne gajene gixkamka, tyechijne gajene galukmakna wannanune. Seyni gi rixanu gi wa tyechijne gajengi ga wa Gita tsomitgi tyechijneya, giyagni rayegixgina tyechijne gajene.²⁰ Gishinikanru wa tokanchi wa nchinyagi: Wayegrechri gi wa rutsrukate pnuute tsruni. Gitpotuko kojwakinitkana, kojwankoxgina gixa. Wa ntokanu rumretkamkana, gixanu koxa rumretanna.²¹ Seyni wa tye pejnunanuka kamrutingina ngiwaka chinanu, gi rixanu gi rumatluna wa nyokanatjeru.²² Nuna.
Nunkaklewygitna gkojwakjenepa. Nma munkanumka, gimka nunkaklewyegitanna, gimka kmukochirepna, seyni nunkakna. Giyagni xani maleshayna rushyamukochiretinrina.²³ Nayegixjeru Nuru koxa rayegixa.²⁴ Wane nma mixkanupa wanna yegi, satu mkamrutanutu, gimka waneyapna mukochirna. Ga wa xani Gita koxa ga

wa Nuru koxa retna. Rayegixnona Gita ga Nuru koxa.²⁵ Seyni poyagkakikolupa yonchi chinyawaka Tokanchi Yokanatkaluruya wannanu: **Gike chinanu rayegixnona.**

²⁶“Ga wa runanu Kgimnanukaleru, Wale Girchi yegi nyokanyegitangi, wa Giwekkaluru galikakpotu, wa Girchi yegi gishpakyachri. Wa runinipa, Wale gipgujtattanno.²⁷ Wa gixa koxa gipgujtalewatanu gi rixanu nyinuwakinyakawa gimwano.

Geso gomkagi ginkaklewleta

16 ¹“Tyekaka nunkakgi gma pupjetinitipa.
² Ginkaklewwakapjikaka giknokikolupa. Runanu gipapko wa katukokta giylatangi kagwakanru Goyakalu chinanu kamrurewatrinri.³ Tyekaka kamrutingina gi rixanu gi rumatluna Girchi, gi wa Gitako.⁴ Seyni wa tyekaka nunkakgi, wa rapokinipa walepapko gishinkapanru wa wane nchinyagi. Seyni tyekaka gi nunkakgi muchinanu, gi rixanu gixa yegi nwa.⁵ Ga wa xani nyokanatjeru yegi nyanutka, ga wa gixa gi satuna gepomgano, ‘¿Ginaka pyanu?’⁶ Seyni gi rixanu nunkakgi tyekakpirana gwamonnu mpachikgajita.

Giwekkaluru Kpashiri kamrurepirana runkakleta Geso

⁷“Seyni galikaka nunkakgi gipxakikolupni nyinripa, gi rixanu wane nma yakanu Kgimnanukakleru gi ginanmaka gixa yegi. Ga wa Gita wane yinipa, Wale nyokanyegitangi.⁸ Wa Kgimnanukakleru gininipa rushinikanutanna tyechijne gajene mukochripirana, ga wa poyagkaklewlupirana, ga wa giklukanuwlpurana.⁹ Mukochripirana galikaka rushinikanutanna, gi rixanu gi

ralixnona Gita. ¹⁰Wa
poyagkaklewlpurana rushinikanutanna,
gi rixanu Girchi yegi nyanu. Gi wa
getanutkano. ¹¹Ga wa
giklukanuwlupurana rushinikanutanna,
gi rixanu tyechijne gitsrukate
giklukanuwnnayegjixkalurupa.

**Galikaka potu Giwekikalurupirana
runkakleta Geso**

¹²“Gi gepika waneyawano
nunkakyapgi, seyni xani gi gimkata
kashnantakletlu. ¹³Wa runinipa galikaka
potu Giwekikaluru Wale kosekangi
pejnuruko Galikakpotunanu Tokanchi
yegi. Gi rixanu gi Waleko rushinikanu
runkakletanu, seyni wa yijnakotyalu
pejnunanka runkakletanu. Runkakangi
ginachrikakapirana. ¹⁴Wale chinanu
numalwutikolupa, gi rixanu Gitanu
rawanu. Walepirana runkakangi.
¹⁵Klunerukta Girchinu walekoxni
Gitanu. Giyagni wane nchina wa Gitanu
rawini, runkakangi.

**Gwamonnu gimuwlu
gixkalurupni, china Geso**

¹⁶“Pshinitsonu gi getanutkano.
Wanepnute pshinitsonu, getanutnakno.”
¹⁷Giyagni wane chinkakna pimrine
yimaklene,
“¿Klunerni wa tye wa wane chinyawu,
‘Pshinitsonu gi getanutkano. Wanepnute
pshinitsonu getanutnakno.’ Ga wa ‘gi
rixanu Girchi yegi nyanutka?’”

¹⁸Giyagni wane chinna, “¿Klunerni
china, wa ‘pshinitsonu?’ Gi wumata
jemlu wa wane chinre.”

¹⁹Rumata Geso raluka
gepomgaletyaluna. Wane chinna,
“¿Gixkakluko gepomgakaka wane
nchininri, ‘Pshinitsonu gi getanutkano.
Wanepnute pshinitsonu, getanutnakno?’”
²⁰Galikakni, galikakni wane nchingi, wa
gixapa chiyagatanu, ga wa

gwamonuwatanu. Tyechijne gajene
gimuwanatu. Gixa gwamonuwatanu,
seyni gwamonnu gimuwlu gixkalurupni.
²¹Wa suxo tushpakawugenetini,
kachinolu teta gi rixanu rapokatka
topapko. Wa rushpakinitka mturu gi wa
tushinikatkalu tsalewninrinanu,
tumuwe chinanu wa tyechijne
rushpakinriyatka satu yineru. ²²Giyagni
xani gixa koxa galikakni kachinolu geta.
Seyni netanutnakgi ga wa
gimuwgajitanu. Gikeko koningi
gimuwle. ²³Walegognepa gike
gagjitanno gixa. Galikakni, galikakni
wane nchingi, klunerukcta gagjitanru
Girchi ngiwakaya Wale genekangi.
²⁴Xanigognenanu gike gagjitawa
ngiwakaya. Gagjitanru ga wa
gyoptotanru tseruwninripa gimuwle.

“Girchi yegi nyanutka,” china Geso

²⁵“Tyekaka yapkaklu tokanchiya
nunkakgi. Wa gipapko ginanu, gi wa
yapkaklu tokanchiya nunkakangi. Seyni
pgujetanwaka nunkakangi Girchipirana.
²⁶Walegogne gixa gagjitanu ngiwakaya.
Gi wane nchingi Gita gagjitanru Girchi
gixa chinanupa. ²⁷Gi rixanu Girchiko
galukgi gi rixanu gixa galukno, ga wa
galixno Goyakalu yegi nuyakatya.
²⁸Girchi yegi nushpakanmya. Tyechijne
nuna. Nuknokamtanutnaklu tyechijne.
Girchi yegi nyanutka.”

**“Gita gaalixaplu tye psolchijneko,”
china Geso**

²⁹Wane chinruna yimaklene, “Petanu.
Xani pgujetanuwaka pchina
yanumsaleta. Gi satuna yapkaklu
pchina. ³⁰Xawakni wumata Pixa gimatl
ptowrunanuka. Gi pmaga gepomgakota.
Tye chinanu walixa Goyakalu yegi
puyakatya.”

³¹Rugitna Geso, “¿Xawakni galixge?
³²Gipapko ginanu, runatka,

gitspalkakanu. Satkaka rawyawaka yanu. Gitapje giknokamtanu. Seyni gi Gitapjeni, gi rixanu Gitaymalu Girchi.

³³“Tyekaka nunkakgi waneygi nchininripa giglewanshinikanru Gita chinanu. Tyechijne waneyapgi salewakchi. Seyni kiglenshinikanupgi. Gita gaalixaplu tye psolchijneko.”

Geso gagjigognere

17 ¹Tyekaka wane china Geso. Teno yigata. Wane china, “Nuru, nopapko gapokatka. Puturu gimalwutikolupa Pixa chinanu, wa Pixa koxa gimalwutikolupa Puturu chinanu. ²Wane pixa gitakletno pejnurune yine chinanu, wa pejnuruneko penekyano, Gita genekyapna ruwekinrina gike rixiniko mnikawnakatupa. ³Tyenwa giweklu gike rixiniko mnikawnakatu, wa rumatyappyina, satupjeru Goyakalu galikakpotunanu, ga wa Geso Kristo wa pyokanatanrundo. ⁴Gita chinanu pumalwutikolutka tyechijneya. Nnikatatkalu kamrurchi penekyano nkamrutyaplu. ⁵Ga wa xani, Nuru, penekanno noyaknu, wa Pixastsi nwini noyaknununu tye psolchijneko mawanatkanuwa.

Geso gagjigogneyegitna yimaklene

⁶“Wa nyi yine tyechijne gajene penekyano, nekakgigiwakatyi. Pixanune, ga wa Gita penekatka. Rumretatokanutyina. ⁷Xawakni rumatatakuna pejnurakkako penekyano Pixa ruyakaty. ⁸Gi rixanu wa tokanchi wa penekyano, nenekatkana. Yoptotatkuna. Rumatatakuna galikakpotunanu Pixa yegi tuyakatinri. Ga wa ralixna Pixa yokenatyano. ⁹Wanna chinanu nagjita. Gi wa tye psolchijne gajeneko chinanu nagjita, seyni penekyano chinanu, gi rixanu Pixanunni. ¹⁰Wa pejnuruko wane nixle,

Pixa wane gixleni. Pixa wane gixle Gitankoxni. Gimbalwutkalurno waleya.

¹¹Gi wa tyechijnetkano, ga wa wanna tyechijne gwawa. Pixa yegi nyanu Gita. Nuru kpashiri, pgiwakaya pumretanna wa penekyano, satupjerune rixinripna, Wixa pixka. ¹²Wanna yegi nwanatini, Gita gimretanatna pgiwakaya. Wa penekyano numretanatna. Gi satuna gamgiyna wanna, seyni kamchi jiglokanrunapjeni gamgana, moyagkakikolupa wa yonatkaluru.

¹³“Ga wa xani Pixa yegi nya, ga wa tye wane nchina tyechijneya, waneyna rixinripna numuwle tseruwnapotutachri.

¹⁴Gita geneknka ptokanu, ga wa tyechijne gajene gayegixna, gi rixanu gi wa tyechijne gajenni, Gitako pixka, gi wa tyechijne gajerno. ¹⁵Gi wa nagjita wa Pixa gwapyapna tyechijneya, seyni Pixa girukotyapna mugletuya. ¹⁶Gi wa tyechijne gajenni, Gita pixka; gi wa tyechijne gajerno. ¹⁷Kpashirine pixkakanna galikaka potu ptokanuya. Galikakpotni ptokanu. ¹⁸Wa tye psolchijneko Pixa yokenatno, waneko pixka nixa tye psolchijneko yokenretna. ¹⁹Wanna chinanu Gitnanuko kpashiri nixnawa, kpashirine rixinrikoxapna wanna galikaka potu tokanchiya.

Geso gagjigogneyegitna gapatachinenpa

²⁰“Gi wannapje chinanu nagjita, seyni koxa wa nalixjenepa wanna tokanu chinanu. ²¹Satupjerune rixinripna pejnuruneko, Pixa pixka, Nuru, Gita pwinri, ga wa Gita Pixa nwinri; wanna koxa satupjerunepa Wixa rawinripna, wa tyechijne gajene galixinripa Pixa yokenatyano. ²²Wa noyaknu penekyano, wale nenekatkana. Wa satupjerune rixinripna, Wixa pixka satupjerunwu. ²³Wanna nwinri Gita ga wa Pixa Gita pwinri, satupjerune rixpotutinripna, wa tye psolchijneko gajene gimatinripa

Pixa yokanatyano, ga wa pushinikyana
Gita pushinikiniko pixka.

²⁴“Nuru, wa wanna penekyano
naluklu ginakaktanwa Gita, wanna koxa
Gita yegi gwanu, wa retyapluna
noyaknu penekyano. Gi rixanu Pixa
gishinikno tyechijne ma mutaakanuwa.

²⁵“Nuru poyagkakachri, tyechijne
gajene gi gimaty, seyni Gita gimaty.
Ga wa nyi gimata wa Pixa yokanatyano.

²⁶Gita gimatkakna pgiwaka, ga wa
numatkakanna, wa gishiniklewlu wa
pushinikyano wanna rawinripa, ga wa
wanna nwinripa.”

Geso samyookaluru ga wa kashichkaluru

18 ¹Wane chininitka Geso, yatka
yimakleneyma. Setro Gapga
wakanute yatka, wa sana gwiywaka.
Geso jiglokamtu sana yimakleneyma.

²Ga wa Gota koxa wa samyokjerupa
rumatlu sana. Gi rixanu gixo kata wane
rapatjetyana Geso ga wa yimakleneyma.
³Giyagni Gota ganikna solalone, wa
tsrukakalune sasertotene ga wa
Gwariseyonetowrerune. Wane yana
yoichiikaluroyma, kataluyma,
giylalewapiyama.

⁴Giyagni Geso gimatl tuptowrunanuka
wa ruknogjerupa. Potukle ya. Wane
chinna, “⁵Katu gjiga?”

⁵Rugitluna, “Geso, Nasare gajeru.”
Wane chinna Wale, “⁶Gitni.”

Wannaymakoxlu Gota samyokjeru.
⁶“⁷Gitni,” chinanna Geso,
ruxirikamtanna. Nakgamtanna.

⁷Giyagni rumepe gepomgaletatnakna,
“⁸Katu gjiga?”

Wanna wane china, “Geso Nasare
gajeru.”

⁸Rugita Geso, “Nunkakatkagi Gitni.
Giyagni Gita gjigjini getasha yaletanna
nyi,” ⁹poyagkakikolupa tokanchi Wale
chinyawaka, “Wa penekyano, gi satuna
gamgiyno.”

¹⁰Giyagni Simo Petro
kyoglolewapreru, koshpaklu. Rustaklu
sasertotene gitsrukate potu wayegreru,
ga wa rustakjepitlu. Potuklejepi
rustakyalu. Wayegrechri giwaka Malko.

¹¹Giyagni Geso wane chinru, “Petro,
gipata pyoshmakanru yoglolewapi. Wa
Girchi genekyano wa girapiston, ¹²gi ge
nurinro?” Wane china
salewnalepapirana.

Geso Ganasa yegi

¹²Giyagni solalone, ga wa ksolaloteru,
ga wa Goteyonetowrerune, wanna
kashichlu Geso. Rostutluna. ¹³Ganasa yegi
gapka ranikluna. Gi rixanu Kaygwasu
gimatjirni. Walenwa wale walapu
sasertotene gitsrukapatu. ¹⁴Walenwa
Kaygwasu wa Goteyone giykotachri, wa
wane chinachri wa rupxakyapna wa satu
jeji gipniripa yine chinanu.

Sasertotene gitsrukapatupji rawini Petro

¹⁵Simo Petro gomkagitlu Geso, ga wa
satu yimakleru. Wa tye yimakleru rumata
sasertotene gitsrukapatu. Gesoyma
jigloklu sasertotene gitsrukapatupji.

¹⁶Maleka, gipgyaptostsi rawanata Petro.
Giyagni rushpaka wa satu yimakleru wa
sasertotene gitsrukate potu gimatanru.
Ruynumsatlo gipgyapto gajero. Gitoko
raniklu Petro.

¹⁷Giyagni wa gipxaklewatachro
gipgyapto gajero wane chinru Petro,
“¹⁸Gi ge tye jeji yimakleroxyi pixa?”

Wale wane china, “Gi wa gitni.”

¹⁸Wane tunwanatna wayegrechne ga
wa towrechne, yoshikpawatachine. Gi
rixanu kachikleru. Rolkana. Petro koxa
wannastsi tunwata. Rolka koxa wale.

Sasertotene gitsrukate potu gegomgalu Geso

¹⁹Giyagni wa sasertotene gitsrukate
potu gepomgalu Geso,

yimaklenepiranaya, ga wa runkaklewleya.
²⁰Geso gigitlu, “Pgujetanuwaka potu nchnina yanumsayegletna psolchijneko gajene. Gita ginkaklewjeta ginkaklewkwakpiya, wa rapatjejetyawakna pejnuruneko Goteyone. Gi wa yogimawakako nunkaklewaty. ²¹¿Klu pepomgiyuno Gita? Pepomganna wa yijnakotachine wa nchinyawakna. Petanu. Wanna gimata wa nchinyawakna.”

²²Wa wane chininitka, satu towrechri wane tunwanatachri giptagojitu Geso. Wane china, “¿Wane pixa gigletlu sasertotene gitsrukate potu?”

²³Rugitlu Geso, “Wa gektutu nyanumsatini, pupgujetanru gektutu, ga wa kigleru, ¿klu chinanu puylakno?”

²⁴Giyagni sasertotene gitsrukate potu Kaygwasu yegi yokanatlu Ganasu gostutkaluru.

Petro nutatlu Geso

²⁵Wa Simo Petro tunwa golkalenatachri. Wane chinruna, “¿Gi ge satu yimaklerkoxyi pixa?”

Wale nutata. Wane china, “Gi wa gitni.”

²⁶Satu sasertotene gitsrukate potu wayegreru, wa Petro gistikjepmoletanru, wane chinru, “¿Gi ge sana netyayi Waleyma?”

²⁷Giyagni rumepe nutletatnaklu Petro. Waneklu yanumatatka gaxawripa.

Geso Pilato yegi

²⁸Giyagni Kaygwasu yegi ranikyatkaluna Geso. Tsrupji, Pretoryopji ranikluna. Goyechnokawni. Wannako gi jigloklu Pretoryopji ma puchowninripna, seyni wa Tsru Giknoglushgogne nachnewlu nikinripna.

²⁹Giyagni maleka rushpakyegitna Pilato. Wane china, “¿Klu gjiggyegitlu tye jeji?”

³⁰Rugitluna. Wane chinruna, “Gektutu ma kamrutkanumka wa Tye, gimka wsamyokanyi.”

³¹Giyagni Pilato wane chinna, “Ganikanru gixa. Giklukanuwnayegjixanru Tokanchi Yokanatkaluru gixanu chinyawaka.” Wane chinruna Goteylene, “Ginanshichkaluru wuylatyaplu satu.” ³²Wane rixa wa poyakkakolupa Geso wane chinre, wa rumatkakyana gi pixkalutu gipukchi rupninripa.

Pilato gepomgalu Geso

³³Giyagni Pilato rumepe jiglokletlu Pretoryopji. Tomsatlu Geso. Wane chinru, “¿Pixni Goteyone Pogiryi?”

³⁴Rugita Geso, “¿Pixako pushinikanrerge wane pchina, waka pimrinra ginkakyi wa Gitaya?”

³⁵Rugita Pilato, “¿Gitlege wa Goteyo? Pumolene ga wa tsrukakalune sasertotene gita samyokyina. ¿Kluneru pkamruta?”

³⁶Rugita Geso, “Wa npogirewatyawaka gi wa tyechijne rawa. Tyechijne rawkamka npogirewatyawaka, ntowrerune yagotkakanmaka nma samyokikotupmaka Goteyone yegi. Ga wa xani npogirewatyawaka gi wa gewi rawa.”

³⁷Giyagni wane chinru Pilato, “Giyagni ¿pogirchiklayge Pixa?”

Rugita Geso, “Pixa wane chinyawaka pogirchi nixinri. Wale chinanukni nushpaka, ga wa wale chinanukni nuna tyechijne, nupguitayaplu tokanchi galikakpotunana. Pejnuruko galikakpotunana gixachri yijnaktokanutno.”

³⁸Pilato wane chinru, “¿Klunerni wa galikakpotunana?”

Waka Geso waka Warawasu

Wa wane chininitka rushpakaatnakna Goteyone yegi. Wane chinna, “Gi satuna nukshikyalu ruklukanuwninri. ³⁹Wa gixa gixjetyawaka satu nkoshpakyegityagi tsru Giknoglushgogne. ¿Giyagni gi ge

galuklu gita koshpakyegityapgi
Goteyone Pogire?”

⁴⁰Giyagni pejnuruneko gimepe
saplewletatnaka. Wane chinna, “Gi wa
Tyepni, seyni Warawasu galikakapni.”
Ga wa Warawasni kachowgurni.

Getanru wa jeji

19 ¹Giyagni Pilato gwapatkalu
Geso. Kochipjejixlu. ²Solalone
kona kamgiylona sagyeta.
Yoshmakjiwutluna. Pakniga
yoshmookaluru pixkalutu mkachri
yoshmakluna. ³Wane chinna, “iGalu,
Goteyone Pogire!”

Ruylakluna.
⁴Pilato gishpakanatnaka maleka. Wane
chinna, “Getanu. Nanikyegitgi maleka,
wa gimatiripa gi satuna
rukluwanuwninri nukshikyalu.”

⁵Giyagni rushpaka Geso maleka.
Sagyeta kona kamgikolo rutaka, ga wa
pakniga yoshmookaluru pixkalutu
mkachri. Wane chinna Pilato, “Getanru
wa jeji.”

⁶Giyagni retinitkaluna tsrukakalune
sasertotene ga wa towrechine,
saplewatna. Wane chinna,
“iKoroshishkita putakaganru!
iKoroshishkita putakaganru!”

Pilato wane chinna, “Gixako
ganikanutkalu. Koroshishkita gitakanru.
Gi rixanu gita gi gikshikyalu wa
rukluwanuwninri.”

⁷Rugitluna Goteyone, “Wixa waneya
Tokanchi Yukanatkaluru. Tokanchi
Yukanatkaluru wixanu chinyawaka
rumkata gipnaleta, gi rixanu Goyakalu
Wgene rixnawa.”

⁸Tye tokanchi jeminitka Pilato, pnuete
pixkletkalu. ⁹Rumepe jiglokletatnaklu
Pretoryopji. Wane chinru Geso,
“¿Ginaka guyakatyachriyi?”

Seyni Geso gi gigitlu. ¹⁰Giyagni wane
chinru Pilato, “¿Gita gi wa puynumsata?

¿Gi ge pumata wa gitaaka
koroshishkita nutakyapyi, ga wa
nutaaka nkoshpakyapyi?”

¹¹Rugita Geso, “Tengogne pma
mutaakikamka gimka putaako Gita
chinanu. Giyagni pixa yegi nsamyokjeru
pixa pnuete tsru mukochri waneylu
wale.”

Pilato samyoklu Geso koroshishkita rutakikolupa

¹²Wanekluyakawa Pilato galukmaka
koshpaketlu. Seyni Goteyone saplewata.
Wane chinna, “Wa Tye pkoshpakinipa,
gi wa Susa gimatjerpatkayi. Girukokta
pogirchi rixnawa yooptopiratlu Susa.”

¹³Giyagni Pilato tye tokanchi
yijnakotinri, maleka ranikatkalu Geso.
Gitakyagoklewjetikwaka tuplata, wa
Sotlumta chinikwaka, ga wa Gewreyone
tokanu, Kawata. ¹⁴Tsru
Giknoglushgognestsitkani.
Tumananutkani. Wale wane chinna
Goteyone, “Getanru Mpogire.”

¹⁵Giyagni wanna saplewata,
“iPuxriiakanru! iPuxriiakanru!
iKoroshishkita putakaganru!”

Wane chinna Pilato, “¿Wa
koroshishkita nutakanru mpogire?”

Rugitluna tsrukakalune sasertotene,
“Maleshaywu wpogire. Susapjeni.”

¹⁶Giyagni samyoklu koroshishkita
rutakyapluna. Yoptytoluna Geso.
Ranikatkaluna.

Koroshishkita gitaakaluru

¹⁷Rutjitaroskitatata. Ralimta.
Jiwchiswaga yegi chinikowaka ya.
Gewreyone tokanu wane chinka Kolkota.

¹⁸Wane koroshishkita rutakyaluna, ga
wa Waleyma pimrine gepi. Satkaka
pasretkaka. Geso ganikaji gwa.

¹⁹Yonatkoxl Pilato
jigyegitkolupirana. Koroshishkitaptostsi
rutaklu. Wane chinyongata:

Geso, Nasare Gajeru, Goteyone Pogire.

²⁰Giyagni gixo Goteyone getyongatlu tye jigyegitikolu, gi rixanu koroshishkita rutakikwaka Geso, gi gowuklu tsru pokchi. Gewreyone tokanu yonatika, ga wa Ratinane tokanu, ga wa Kriykone tokanu. ²¹Giyagni tsrukakalune sasertotene Goteyonenu wane chinru Pilato, “Gi wa ‘Goteyone pogire’ pchinkakyongatanru, seyni, ‘Wale wane china, “Goteyone Pogirno” ’”

²²Rugita Pilato, “Nyonatanrutkani nyonatatkana.”

²³Giyagni solalone koroshishkita gitakinitkalu Geso, rawamkatatkaluna. Gepkoxamkoje kotspaltatyatkaluna, satkaka solalonenupa. Ga wa gimkaluchrata. Wa gimkaluchrata myotsgakotni. Teno ruyaka saxpaletika psoluko. ²⁴Giyagni wannakakluko wane chinkaka, “Gi wa wsusukanru, seyni wupenokatanru galikaka katunpaktani wa mkachri.”

Wane rixa poyagkakikolupa wa yonchi wane chinachri:

Kotspatluna nomkalu wannanupa rixinripa.

Nomkalu chrata rupenokotna.
Giyagni wane rixna solalone.

Geso gitaklo runro Gwa yegi girukotyaplo

²⁵Geso koroshishkitatestsi koxa tunwanatna runro, ga wa runro gepuro, ga wa Mariya wa Kleyogwa gnuromo, ga wa Mariya Maktala gajero. ²⁶Giyagni Geso getinna runro ga wa yimakleru rushinikanru wane gwanatachri, wane chinro runro, “Suxo petanru puturu.”

²⁷Wanepnute wane chinru yimakleru, “Petanro punro.” Wanekluyakawa yimakleru ganiklo waleyma tixinripa.

Geso gipnale

²⁸Wanepnute gi rixanu rumata Geso pejnurkakako poyagkaakalurutkani wa

yonchiko poyagkakikolupa, wane china, “Nonunnagatewata.”

²⁹Wanenanro pastono kachgalu gwanro katsepolo. Giyagni wanna shichpongakaklu katsopi kachgalu. Gisopoje rutakluna. Ginama rapookakluna. ³⁰Giyagni kachgalu rurinitka Geso, wane china, “Nikatkalurutkani.”

Yonogjiwumta. Reneklu ruwekinri.

Yoglokwanapatka Geso

³¹Tsru Giknoglushgognestsitkani, ga wa tsrupotgognenwa wale gapnanutikalurgogne. Giyagni koroshishkita ma mutukmanetinitipna gapnanutikalurgogne, Pilato ragjtna Goteyone jiknagatpalitikolupna, wa koroshishkita koshpakikolpatkana.

³²Giyagni solalone wane ya. Yoptowaka gwachrigapkani jiknagatpalitna. Waneko pixka rixanruna wa satni wa Waleyma koroshishkita gitaakalurni.

³³Seyni wa Gesni yegi rapokinna gi rixanu retluna gipnachritka, gi wa jiknagatpalitkaluna. ³⁴Seyni satu solalo yoglokwanapatlu chokorujeya. Waneklu rushpaka gigraga, gonu koxa.

³⁵Wa getachri gipgujtatl, ga wa rupgujtale galikaka potu. Wale gimata wa galikaka potu china, wa gixa koxa galixinripa. ³⁶Gi rixanu tyekaka wane gixka poyagkakikolupa wa yonchi chinikwaka: **Gi jiknagaputko Wale.** ³⁷Ga wa satu yonchi koxa wane chinatnaka: **Retanruna yoglotanruna.**

Kapnatkaluru Gesni

³⁸Wanepnute Gosi Garimate gajeru, Geso yimaklerni seyni giyogimatnachriwa Goteyone pikle chinanu. Pilato ragjita wa Gesnimane koshpakinripa. Ruchichlu Pilato. Giyagni wane ya. Koshpakmanetlu Geso. ³⁹Nikotemo koxa wane ya, wa

muchikawa goyechno yayegitjeru Geso. Raniklo miramunga ga wa galowemunga yapjetkaluro, gepkoxamkojmole patsrujire getko ginnu.⁴⁰ Ranikmanetatkaluna Gesni. Poyitatkaluna mkachrichrata. Pgamlugalo rupoyitluna wa Goteyone gixjetyawaka kapnatikolupa.⁴¹ Wa koroshishkita rutakikwaka waneru sana. Wa sana waneru gerotu yomlechi, satuna ma mutakikowakanuwa.⁴² Giyagni gi rixanu Tsru Giknoglushgognestsitkani Goteyonenu, ga wa gi gowuklu yomlechi, wane rutakluna Gesni.

Yotunru

20 ¹Muchinangogne wa simana, goyechnokawpotuko mapshagakowalu yomlechi tyo Mariya Maktala gajero. Tetlu sotlu gajriikaluru yomlechiya.² Giyagni tasukamta. Simo Petro yegi tya, ga wa satu yimakleru Geso galukanru. Wane chinna, “Kapna ranikyatkaluna Gitsrukaachini. Gi wumata ginaka rutakanruna.”

³Ralimta Petro ga wa satu yimakleru. Yomlechi yegi yana.⁴ Pagasukamtkalunni gepi. Wa satu yimakleru kapnugamtu Petro. Wale gapka gapoklu yomlechi.⁵ Rujnoka getletlu. Retlu mkachrichrata wane gwanatachri. Seyni gi wa jigloka.⁶ Giyagni rapoka romkagitjeru, Simo Petro. Jiglokamtu kapna. Retlu mkachrichrata wane gwanatachri.⁷ Ga wa kasamuwa gijiwu sapwakanatachri gi wa mkachrichratayma rawanata, seyni sapruruukaluru pasretako gitaaikaluru.⁸ Giyagni jiglookoxatka satu yimakleru wa yomlechi gapokgapkatachri. Retlu. Ralixa.⁹ Giyagni gi rumatawaluna yonchi chinyawaka, wa rumkata yotunretinripa gipnachinetskalaya.

¹⁰ Giyagni satokatnakna yimaklene gimolenyegna.

Geso gipgujewnayegitlo Mariya Maktala gajero

¹¹ Wa Mariya maleka tunwanata. Yomlechistsi chiyaganatya. Wa chiyaganatini tujnoka tetyaplku kapna.¹² Tetna gepi Goyakalutowrene klatamkalune tuplanatachine, satu gijiwusretananu, ga wa satu gijixisretananu Gesomane gwanatyawaka.¹³ Wane chinrona, “Suxo, iklu kachoky?”

Wane chinna wala, “Gi rixanu ranikluna Nutsrukati. Gi numata ginakaka rutakanruna.”

¹⁴ Wane chininitka tuprotaka. Tetlu Geso. Wane rawanata. Gi tumatlwa wa Geso rixinri.

¹⁵ Wane chinro Geso, “¿Suxo, klu kachokanaty? ¿Katu pujga?”

Wala kagwaklu sana girukotachrini. Wane chinru, “Gitsrukaachi, Pixa ganikiniplu punkakanno ginaka putakniri. Gita ganikanutkalu.”

¹⁶ Wane chinro Geso, “iMariya!”

Tuprotaka. Wane chinru wala, “iRawoni!” Wane chinreni, “Yimaklewatachri.”¹⁷ Wane chinro Geso, “Gi pkamrukanno, gi rixanu gi wa teno nyawa Gita, Nuru yegi. Seyni nomolene yegi pyanu. Punkakanna, ‘Teno nyanu Nuru yegi ga wa Giru yegi, Noyakalute yegi, wa Goyakalute yegi.’”

¹⁸ Talimta Mariya Maktala gajero. Tunkakna yimaklene wa tetyawakatkalu Gitsrukaachi, ga wa tyepirana wane chinro.

Geso gipgujewnayegitna yimaklene

¹⁹ Wa muchinangogne simana kaynotka, tushyatka gipgyaptokaka wa yimaklene gapatyawaka Goteyone pikle chinanna, runa Geso. Wanna ganikajite

tunwata. Wane chinna,
“Kiglenshinkanupgi.”²⁰Wane
chininitka rekakgimyotna ga wa
gikwanapa. Giyagni yimaklene
gimuwata retyawakluna Gitsrukaachi.

²¹Giyagni rumepe wane
chinretatnakna Geso,
“Kiglenshinkanupgi. Wa Girchi
yokanatiniko pixkano Gita, waneko
pixka nixa yokanretgi.”

²²Wane chininitka, runnipgyayegitna.
Wane chinna, “Gyoptotanru
Giwekkaluru Kpashiri. ²³Wa gixa
kaspukmukochiretanune,
kaspukyegitkalunepni. Wa
gimretmukochiretanune
gimretyegitkalunepni.”

Tomasu malixle

²⁴Wa Tomasu, satu wa pamole gepi
rixinrina, wa Gepirutu chinkaluru, gi
wannayma wane rawanata wa Geso
gapkapini. Giyagni wane chinruna
pimrine yimaklene, “Gitsrukaachi
wetatka.”

²⁵Wane chinna wale, “Nma
metkanuplu wa gimyo wa klawopchole,
nma yoshmaakanuplu nomyoji
klawopna, nma yoshmaakanuplu nomyo
gikwanapa, gi nalixanu.”

iNutsrukate! iNoyakalute!

²⁶Yokgippogne giknoginitka, gitoko
rawanatatkna yimaklene.
Wannaymakoxlu Tomasu. Runa Geso.
Gipgyaptokaka gishyatka. Ganikaji
tunwata. Wane china,
“Kiglenshinkanupgi.”

²⁷Wane chinatkalu Tomasu,
“Pomyokyegitanno pumyoji.
Petamyotanno. Pomyokyegitanno.
Nokwanapa pyoshmakanru. Gi wa
malixakletupyi, seyni galixachripyi.”

²⁸Wa Tomasu gititlu. Wane chinru,
“iNutsrukate! iNoyakalute!”

²⁹Wane chinru Geso, “Gi rixanu
petno, palixa. Giglenshinkanuktalunni
nmametjene ga wa galixachine.”

Twu kiruka rumushinikikolupa

³⁰Giyagni gi gepi pimrikaka
getkalurkaka kamruta Geso, yimaklene
getanu, twu kiruka mutakyongatkotu.

³¹Tyekakni yonatkaluru galixinripa
Gesonwa Kristo Goyakalu Wgene, ga wa
galixinri waneyapgi giwekinri giwakaya.

Geso gipgujewnayegitna payokgipre yimaklene

21 ¹Wanepnute Tiwerya Wenne
rupgujewnayegitnakna
yimaklene Geso. Wane rixa
gipgujewnaleta. ²Rapatanatna Simo
Petro, ga wa Tomasu wa Gepirutu
chinkaluru, ga wa Natanayli, Kana
gajeru Kalilesreta, ga wa Sewereyo
wgenene, ga wa pimrine gepi
yimaklene. ³Wane china Simo Petro,
“Nchaluntapanu.”

Wane chinruna, “Gapakapwu
pixayma.”

Wane yana. Kanawa ruptekna. Wale
yechno, gi satona kashichna.

Tiwerya Wennestsi rupgujewniru Geso

⁴Goyechnokawa chininitka, wanga
tunwanata Geso. Seyni wa yimaklene gi
rumatluna Geso rixinri. ⁵Wane chinna,
“Wiwine, ñgi ge waneygi gnikanrupa?”
Rugitluna, “Malesha.”

⁶Wale wane chinna, “Kanawa
potuklesretate giknokanru chalu.
Gikshikanro.” Giyagni ruknokluna. Gi
rumkata kosletatkaluna, gi rixanu gi
gepiklo shima.

⁷Giyagni wa yimakleru Geso
gishinikanru wane chinru Petro,
“Gitsrukaachikni Wale.”

Giyagni wa Simo Petro wa
yijnakotinitka Gitsrukaachi rixinri,

gimkalu sapwaknawa gi rixanu
mamkutunanni. Tsru wenu
ruptekamtatka. ⁸Ga wa pimrine
yimaklene kanawa yapamta, gi rixanu
gi gowuklu chiji, seyni pamymolesti
getko gowuknuni. Kosemtluna chalu
shimayma.

⁹Giyagni chiji ruptekinitkana, retrluna
chichpawa giglepokotkaluru, ga wa
shima gitaaikaluro, ga wa jimapro.
¹⁰Wane chinna Geso, “Ganikanro shima,
wa gkashichanronatka xani.”

¹¹Ratskotlotra Simo Petro. Chiji
kosemtlu chalu. Katsepomnuro tsrokaka
shima. Satu pacha pamymole mapa
shima. Wane pejnumkalo, seyni gi
ruskaka chalu. ¹²Wane chinna Geso,
“Ginanutka. Gnianutka.”

Gi satuna yimakleru tserpiranawata
wa repomgiyaplu, “¿Katyi Pixa?”
Rumatluna wa Gitsrukaachi rixinri.
¹³Runa Geso. Koscheklu jimapro.
Renekna. Waneko pixka rixlo shima.
¹⁴Tyenwa mapa kata chininri
rupgujewna Geso yimaklene yegi wa
gipnachinetskalaya rali yotunretinitka.

Peneka nikletanna nowegatene

¹⁵Giyagni rali nikaprikletinitkana
Geso wane chinru Simo Petro, “Simo
Gonasu wgene, ¿gi ge pushinikno wa
nyi pnute?”

Wane chinru, “Gigi, Gitsrukaachi.
Pixa gimata nalukyayi.”

Wane chinru, “Peneka nikletanna
noprane gowega wgenene.”

¹⁶Rumepe wane chinretatnaklu,
“Simo, Gonasu wgene, ¿gi ge
pushinikno?”

Wane chinru, “Gigi, Gitsrukaachi.
Pixa gimata nalukyayi.”

Wane china, “Peneka nikletanna
nowegatene.”

¹⁷Mapa kata chininri wane chinru,
“Simo, Gonasu wgene, ¿Gi ge palukno?”

Wamontaklu Petro wa mapa kata
chininri wane chinru, “¿Gi ge
palukno?”

Wane chinru, “Gitsrukaachi, Psoluko
pumata. Pixa gimata nalukyayi.”

Wane chinru Geso, “Peneka
nikletanna nowegatene. ¹⁸Galikakni,
galikakni wane nchinyi wa makluji
pixini pushrikapchijitnawa.
Palukyawaka pya. Wa tsrutzoleji pixini
pkanrakanu. Satu gishrikapchijitanyi.
Ranikanyi pma maluka yaletyawakanu.”
¹⁹Tyenwa china rumatkakyaplu gi
pixkalutu gipukchi chinanu
rumalwutikolupa Goyakalu. Wane
chininitka wane chinru,
“Pomkagittanno.”

Yimakleru rushinikanru

²⁰Ruprotaka Petro. Retlu wa
yimakleru wa Geso gishinikanru
romkagitjerna, wa rutspanostatkojeru
nikikowakaya, wa wane chinachri,
“Gitsrukaachi, ¿katupni wa
psamyokjerupa?” ²¹Giyagni Petro getlu
wale. Wane chinru Geso, “Gitsrukaachi,
¿ga wa tye, gi rixanu?”

²²Wane chinru Geso, “Nalukiniplu
rutukanu wale nuninpotonanuko, ¿gi
pixanru pixa? Pomkagittanno pixa.”

²³Giyagni rushpaka tye tokanchi wa
moletkakachinkakluko, wa tye
yimakleru gi wa rupnanu. Seyni wa
Geso gi wane chinru, “Gi rupnanu,”
seyni, “Nalukiniplu rutukanu wale
nuninpotonanuko, ¿gi pixanru pixa?”

²⁴Tyenwa yimakleru gipgujtatachri
tyekakapirana. Wale yonatlu
tyekakapirana. Wumatlu wa
rupguitalewe galikakpotunanni.

²⁵Gi gepiikoxlu wa Geso kamrutanru.
Satkaka yonatkamka walepje rixinri,
nkagwaklu gi wa tye psolchijneko
poyagotlo kiuukaka
yonatkalurupmaka.